



慕堂先生傳 翁方綱

先生姓曹氏諱學閔字孝如號慕堂山西汾陽人乾隆辛酉舉於鄉甲戌成進士改庶吉士授翰林院檢討監察御史給事中通政參議太僕少卿內閣侍讀學士宗人府丞

予告致仕卒年六十有九先生官於

朝三十年居諫垣八年兩充史館纂修三巡城再充同考官皆以樸誠勤慎受知

主上官御史時疏請立辟雍部議未准行及官侍讀學士有

特擢宗人府丞稽古之榮也先生爲人敦本行篤於友愛在京師捐俸葺山右三忠祠三晉會館義園并宣武門外楊忠愍公故宅又於未定門外舉掩骼之會偕同志春秋集訂規條以垂久遠其好義多此類也先生爲學以養性爲功精導養之術早歲歷游東南山水居京師每以暇日尋勝西山戒壇香界諸寺晚益專功靜坐儼道院以課孫有詩集若干卷體格在香山放翁間嘗手自校訂河汾諸老集刻之自古詩人在中條王官谷

者若李義山司空表聖元裕之及近日吳蓮洋皆以才力跨越前後而先生獨以性情沖淡與道大適脫然於名譽之外此則三十年同館相知中先生獨許方剛爲能窺見一二者故述其畧爲之傳

曹宗丞逸事

紀昀

曹慕堂宗丞余甲戌同年也交最契慕堂卒時余適以校理祕籍在灤陽闕爲面訣意恒盡然旣而讀石君所作墓誌辛楣所作神道碑慨想生平宛如對晤不勝山陽鄰笛之悲惟慕堂立身之本末二君言之雖詳其文均篤實無愧詞足信天下而傳後世然尙有一二逸事

爲碑誌所未及者乾隆辛巳余與慕堂同司翰林院事
會有八九英俊與同館爭名相軋同中蜚語勢且挂白
簡時余亦薄有聲譽方自危疑不能爲申雪惟坐清閤
堂中與同事相嘆咤慕堂奮起拍案曰諸公以此事爲
眞耶則數人皆輕薄子耳何必爲悼惜如灼知其枉耶
則司院事所司何事而噤口如寒蟬乃邀衆同詣院長
慕堂婉請曰據公所聞此數人褫不蔽辜矣然公此語
從何來儻彈章一上事下刑曹無證佐不能成獄願先
示名姓併列於章中院長沈吟久之事竟中止後八九
人皆先後致通顯無知緣慕堂得解者慕堂亦終身未

自言也同年陳侍御裕齋年過四十未有子又有沮格
不能置妾慕堂倡率鳩貲買一女送其家後舉一子裕
齋夫婦相繼歿有壻謀踞其餘貲百計媒孽孤兒孀婦
且旦夕不自存聞者扼腕然莫能爲力也慕堂又鳩率
同年仗義執詞逐壻子乃得安今已讀書成立矣當時
論者或以慕堂爲多事慕堂恬不介懷嗟乎朋友以異
姓列五倫所貴乎濟緩急恤患難不以生死易心也平
時酒食徵逐聲氣攀援怡怡然親若兄弟及身後遇小
利害乃引嫌避怨坐視其後人之阡危亦安貴此朋友
耶慕堂此舉余時以有所牽制未能赴約然心恒愧焉

論者乃以已不能爲轉非慕堂之能爲抑亦偵矣慕堂天性恬淡超然於聲利之外似不甚預人之事者又稱平靜穆言訥訥如不出而此二事見義必爲乃如此賢者固不測哉余十六七歲入名場三十通籍仕宦四十餘年閱事非一閱人亦非一求如慕堂之古誼指不能數數屈也人往風微慨然遠想因書此以示受之侍御兄弟俾存諸家乘焉乾隆甲寅十一月七日河間紀昀撰時年七十有一

答曹慕堂給事書 戴震

承示元和志汾州一條僕有其全書曾摭入志其書之

可寶貴自孟堅地理志道元水經注而外無有上之者矣然地志至隋唐鑿空傳合之說又多於前人稍失精覈不能無謬如叙汾州沿革數行云後屬魏謂之西河子夏居西河吳起爲西河守皆謂此也謬一云武帝置西河郡理富昌縣謬二云黃初二年乃於漢茲氏縣置西河郡卽今州理謬三云高齊又於此城置南朔州謬四云周宣帝於此置汾州謬五云大業三年廢汾州謬六水經注謁泉山嵯半有一石室去地可五十餘丈而張守節引隨園集記云此爲子夏石室退老西河居此有卜商神祠元和志卜商神祠在縣北四十里考之魏

書太和八年置西河郡治茲氏城是爲西河郡治在茲氏之始道元注水經時西河郡治新在此地故於謂泉山及文水汶水絕不涉及子夏設教以此地近汾遠河西河之上不得移而虛加之汾上耳武侯浮西河而下中流顧而謂吳起曰美哉山河之固浮河非浮汾也道元以浮河事繫之夏陽子夏陵及廟室繫之郃陽咸於魏郡安邑不遠况古所稱西河未嘗以名郡卽吳起爲西河守亦非如後世之郡守特舉龍門西河該河之左右諸城魏未失陰晉少梁已前其疆土在西河郡者南至華陰西至洛水北至今榆林府之北鄂爾多斯地而

趙之西邊邑與魏鄰不與秦鄰故趙成侯三年當魏武侯之十五年趙世家云魏敗趙藺及秦孝公八年與魏戰取少梁越四年當趙成侯之二十四年趙世家始云秦攻我藺其後藺離石中陽屢失於秦力復之以守險魏秦之攻趙藺皆自河西來漢茲氏在離石正東趙地非魏地凡以爲魏之西河謬也東觀記西河郡治平定縣離石在郡南五百九里吉甫言理富昌縣者徒因地志首列富昌故云然後漢書始云凡縣名先書郡所治也孟堅作志未有斯例閻百詩曾論之如梁國先書碭而治睢陽汝南郡先書平輿而治上蔡是也百詩於

西河郡亦從元和志則偶失檢耳凡以爲漢西河郡治富陽縣者謬也水經原公水出茲氏縣西羊頭山道元注云魏黃初二年西河恭王司馬子盛廟碑文云西河舊處山林漢末擾攘百姓失所魏興更開疆宇分割太原四縣以爲邦邑其郡帶山側塞矣王以咸寧四年改命爵土其年十二月喪國臣太農閻崇離石令宗羣等二百三十四人刊立石碑以述功德今案晉書西河繆王斌字子政魏中郎武帝受禪封陳三年改封西河咸寧四年薨子隱立謚字及改封與水經注微異水經以碑繫之魏黃初二年尤可致疑元和志云魏黃初二年

於漢茲氏置西河郡然則黃初二年實魏置西河郡之始前此建安十八年省州并郡廢西河郡入太原至是復分太原之四縣置西河郡也黃初二年下當有記置郡所起者脫去其文自黃初二年越二百六十四年爲北魏太和八年西河郡始治茲氏城司馬斌葬茲氏故有廟碑在此吉甫因水經注西河王廟碑繫之茲氏繫之黃初遂以爲是時卽置郡茲氏殊疏晉書地理志西河國領縣四首離石固用後漢書例縣名先書郡所治况碑文言其郡帶山側塞宜爲離石甚明晉改茲氏曰隰城碑末稱離石令宗羣等不稱隰城魏晉之西河皆

因漢永和五年徙治離石之舊可據證固不一矣凡以爲魏晉之西河治茲氏者謬也元和志介休下云魏明帝時爲賊所破至孝靜帝更修築遷朔州軍人鎮之因立爲南朔州但領軍人不領郡縣隋書以南朔州爲齊置與介州皆於西河郡下言之疏謬失覈南朔州介州竝在介休而元和志又汾州下溷稱高齊於此城置南朔州蓋禰襲羣書前後失檢如是凡以南朔州繫之高齊繫之汾州者謬也魏書地形志延和三年置吐京鎮太和十二年改鎮爲汾州治蒲子城其地在今隰州孝昌中陷移置西河事詳裴良傳是爲汾州治在西河之始不待後周宣帝也且西魏別置汾州在今陝西西安府宜川縣後周以東魏之南汾州爲汾州在今吉州尋改置汾州於今霍州平齊後廢其之汾州齊郡縣屬介州隋開皇十八年改汾州爲呂州卽後周所置在今霍州者唐武德初以介休郡爲介州西河郡爲浩州三年改浩州爲汾州是周隋之汾州皆非西河郡境而漫曰宣帝於此置汾州大業三年廢汾州甚矣沿革之不易言也以近古而有法如吉甫之作圖志一條中紛然不治者六焉此外府境故實水經河水南過西河圖陽縣東又南過離石縣西又南過中陽縣西又南過土軍縣

西據地望考之中陽西濱河當在今宜鄉縣境趙世家
秦取我西都及中陽是也道元乃云中陽故城在東東
翼汾水不瀆於河也元和志於孝義縣下云魏移西河
郡中陽於今理此條可證明水經之中陽其所本之書
道元偶失檢元和志中如此事僕曩者嘗據以證水經
及道元注各一中陽至若漢志西都屬西河郡中都屬
太原郡魏王泰張守節濶而一之水經汾水南過大陵
縣東道元注云汾水於縣迤爲鄔澤其陂東西四里南
北一十餘里陂南接鄔地里志曰九州在北并州藪也
呂氏春秋謂之大陸又名之曰漚洩之澤俗謂之鄔城

泊許慎說文曰馮水出西河中陽縣之西南入河卽此
水也道元所言鄔澤北起大陵南接鄔正今平遙之西
孝義之東介休之北最爲洿下汾川轉徙不常之地說
文之馮水乃入河非入汾後世凡流水俗呼某河叔重
得古學於賈侍中未嘗少假借漢中陽西濱黃河說文
亦一證道元就馮字與鄔字牽合謬矣孟堅以鄔縣北
九澤當周職方昭餘祁然爾雅稱晉有大陸燕有昭餘
祁呂氏春秋稱晉之大陸趙之鉅鹿燕之大昭而周禮
昭餘祁與虛池漚夷涑易竝舉鄭康成云漚夷祁夷歟
考嘔夷卽涑水出靈邱祁夷出平舒並今大同府境源

流各別道元混昭餘祁大陸嘔夷而一之尤誤嘔夷亦川而非澤祁縣本晉祁氏之田因一祁字而牽昭餘祁於祁縣因一夷字而疑嘔夷卽祁夷古人言地且彼此交糾又何責後之地志歟爾雅呂覽所稱昭餘祁大昭繫之燕燕之不得跨太原而有祁平遙介休甚明蓋以漢人言周秦則多失以後魏人言漢魏晉則多失以唐人言後魏周齊隋則多失勢使然也魏收卽後魏人而地形志不能詳魏之州郡興廢其餘史厯後一代作前代地志疏漏謬舛實多子長良史也而史記中往往涉傳聞失實之語謂介之推逃入懸山顯戾於左氏春秋

漢西河郡穀羅武澤在西北武澤本名虎澤唐人避廟諱所改胡三省注資治通鑑云虎澤應在五原曼伯之北後漢建武二十六年詔使匈奴徙居西河美稷之虎澤亦卽此澤也蓋境相接矣其說得之五原曼伯其故城在河之西而願景范讀史方輿紀要以穀羅城及虎澤在永寧州北美稷城在汾州府西北皆無可指實自府而西北至永寧州之北羣山簇擁巖谷之險絕無平地以容所謂虎澤者平遙有尹吉甫將臺及墓則後人以晉之太原釋涇原西北之太原而吉甫之跡不難東移千餘里且指一墓實之元和志孝義縣西五里有魏

文侯墳縣東北二十五里有段干木墓縣志則城西五里有魏文侯墓與元和志合城東六里有段干木墓與元和志不合縣西北七里又有三子墓指爲卜子夏田子方段干木是一縣中而段干木墓凡二三水經注河水自河北城南東逕芮城二城之中有段干木塚唐貞觀中詔芮城之魏文侯墓段干木墓並禁樵採元和在貞觀後幾二百年而在芮城者又在孝義凡宗仰昔賢用寄愛慕雖指不知誰氏之壟而聞名起敬可也援以證實用資考覈必有起而辨之者志事頃已告竣不敢苟同前人處略陳梗槩如右

輯五王先生墓誌銘

戴震

自漢以來取士之法不一然未有不惟六藝之文首重者而士氣之振否則宜循其本漢書儒林傳贊曰一經說至百餘萬言大師衆至千餘人蓋利祿之陋然也斯言殆今古同譏獨宋之儒者執經講學相師友之衆同於漢其躬行道義幾幾七十子之所講求矣明初用經義選士能是者視昔之期在通經又何如誠欲造乎賢人聖人立言之心雖經師大儒未易以語此若其流弊苟焉皮傅剽說雷同學不一二年目不覩全經掇拾巍科高第不必素所蓄積也故不見師友之盛如古昔豈

汾陽縣志 卷十三
非徒趨利祿加以得之固易哉原上之貴士士之貴學
豈如是而已哉間有遠尋漢經師授受近接宋儒者之
緒其人世莫之知也孤學而無友泯焉而不彰嘻可慨
惜也夫汾陽有儒者曰輯五王先生以經義補弟子員
一日讀大學之篇憬然曰曩所學殊非也古之學者其
若斯矣自是求得宋真氏大學衍義明北氏衍義補讀
之卽躬行于家教弟子亦以是不令急科名視力所能
爲惠於其鄉鄉人無賢不肖咸目先生善人也然而莫
知其有學先生諱瑞之曾大父時來父明樾父家樺裕
於財有好施名先生性寬厚尤惇師友誼雖或以侮慢
加之不與校意益篤聞者以爲難居父喪有誘結家僮
盜去千金者先生廉知其人置弗問也娶李氏以賢稱
曉大義子二廷槐廷梧女二先生生於康熙二十七年
月日卒於乾隆十一年月日以貲爲州同知未仕子廷
槐拔貢生好宋儒書余東西行至汾晉間多以其賢爲
余言旣而見之一動一言必有矩法蓋能以儒者躬行
世其家如此其先君子旣葬於歿之明年廷槐復再拜
請余銘銘曰

維昔之學孰爲儒宗師友相隨名滿道崇維今之學不
勤以速誰抱其樸允矣爲鵠於家於鄉令聞不忘流厥

孫子俾引而彌光

例贈宣武大夫王公墓表

戴震

周官經之法敬敏任恤者則書之孝悌睦婣有學者則書之其取人也率以是然則行之可表著其卽在是矣汾陽有隱德君子曰秀升王公其居鄉也鄉人賴之有急罔弗調有所興作苟利於一鄉雖竭已之財舉之罔弗力又置塾教其子弟之貧不獲親師者俾成其材乾隆己卯庚辰捐米麥八百五十石助賑太守嘉其好義辭不居先是康熙中公尙少爲謀於鄉遂出已貲鑿渠引汾水文水資灌溉值暘歉而公之鄉獨以有秋八諱

邦選秀升字也曾大父天智大父尙秋父一櫬公得父母愛偉儀表篤於孝友自幼卽習治家事曰有子而父任其勞何貴有子雍正九年新設勇健營選壯士公爲當事所物色欲薦舉以父母老不忍離左右卒辭不赴公生於康熙甲申九月十九日至乾隆辛巳十一月十八日卒年五十有八娶霍氏子五人恒義庠生恒兆壬申科武舉授直隸插箭嶺守備恒禮太學生攀鳳武生恒信太學生女子二乙酉六月旣葬公於村東之原公之生平行事應書法故次其卓者列諸石以傳焉

温方如西河文彙序

戴震

已丑秋余至汾陽應太守孫公之召也屬纂次府志爲之考訂累日月今李侯復以縣志事邀之再至有持溫君方如西河文彙請余言者余未得與方如縱談昔人訪尋金石文字厥意深遠徒見茲編蓋用心亦勤矣方如持三寸弱管躑躅於荒榛頽垣間得其殘碑舐墨手鈔爲人之所不爲在今日誠不易遇其人惜未能遠涉名區且所錄者徃徃雜取府州縣志足之而府轄州縣八若臨若石樓猶闕焉殆力有以限之歟其名書也踵其師周某甫西河遺事西河詩彙云爾府境於七國趙地其西臨永寧寧鄉石樓爲趙之藺離石中陽乃西瀆

河若夾汾四縣距河旣遠隔越重山終兩漢隸太原郡曹魏時中陽東徙茲氏南李吉甫元和郡縣圖志能詳其事晉改茲氏曰隰城及中陽介休俱割隸西河國而介休東接平遙爲太原國之京陵中都鄔元魏太和中改六壁鎮置西河郡治茲氏故城矣平遙鄔仍隸太原郡不改遡而上漢武建邊郡命曰西河治平定縣南距離石五百九里則今陝西榆林府之鄂爾多斯地又上之子夏居西河則今韓城縣一詳東觀記一詳鄭善長水經注作志者襲俗陋漫無辨別茲編載自宋而下以西河表目未爲不可凡爲書若干卷雖所錄文難擬諸

古作者之立言有法特以有涉於方志觀事存之而方
如搜討之勤倘用是專事遺逸爲府州縣志補闕正訛
更加日力增刪成帙豈不足寶愛乎因書以俟之乾隆
辛卯季冬月

柳溪先生傳 卜爾琬

先生郝姓諱之芳字炳青柳溪其別號也宅後園一區
植柳十餘株少時讀書常憇其下及宦遊歸猶盤桓竟
日不忍去因以自號云世爲汾邑望族大父盡美父中
省富而好施以義俠聞先生幼岐嶷讀書過目成誦旣
長眉目疎秀長身聳肩而癯髯修尺餘在稠人中矯矯

獨異識與不識皆畏而敬之然性冲淡與人交樂易和
平又望而知其爲盛德長者也少失怙事繼母孝與弟
之荃之芬友愛無異母嫌終身不忍割產先生遠宦數
十年家事一委兩弟未嘗問有無而兩弟念先生居官
清正輦貲佐宦遊先生以此益勵節操所至以廉吏稱
歸里日囊橐蕭然無長物遠邇莫不嘖嘖稱嘆家遂坐
是中衰然先生卒未之悔始由廩貢司訓壺關尋捐陞
肥城知縣時

聖祖南巡路由山左上憲恐初任未諳差務先生晝夜
撫循其民民樂於趨事事獨集爲東省冠肥邑屢歉收

道殣相望先生奉文賑貸甄別災戶不假手胥役全活
六千餘人因公罷職援例捐復授瑞昌知縣邑在九江
最僻陋先生下車首捐俸立義學訓士嚴定課程不三
四年文風丕振自小學陞中學諸生章君國錄成進士
由是登甲乙榜者接踵又瑞昌向無城隍先生至始議
興築建講堂忠孝節義祠旁日以忠孝節義勉其邑人
蒞任凡十八載循資內陞太常博士改中書舍人
陛見日奉

旨久蒞外任習吏治以同知用分發江南攝江陰事數
月告歸先生喜博覽家本前明舊族多藏書及遊宦四
方見聞益廣晚年習養生家言善五禽戲步履如飛好
着朱絲履近村十數里常步遊其地黃童白髮皆知爲
柳溪先生也優游林下十餘年卒年七十八先是先生
艱於嗣年六十舉子一名鈞自江右歸甫七齡能作大
字及長刻苦讀書以療殤先生卒無子以弟之芬子銘
鉦嗣先生後

贊曰昔陶淵明爲孟嘉立傳叙龍山落帽事生氣奕奕
浮出紙上嘉第四女則固陶母也先太孺人爲先生長
女珖於淵明無能爲役顧先生之視嘉雅量同而德業
過之珖謹述其行事垂諸久遠亦猶淵明戰戰兢兢之

意云爾

劉廉使傳 下爾琬

廉使劉公而位者汾邑人也公生有異稟讀書數行下文章發自性靈淡淡着語理趣湛深沁人心脾年十四補邑弟子員每試輒冠其軍性至孝高曾忌日不異新喪自諸生及貴顯如一日尤睦於親族貧困無依者養之終其身捐重資倡義田之舉爲凶荒備鄉人賴之鄰里有爭訟得一語卽解散年三十三中式本省鄉試第八名舉人雍正元年授安陽知縣縣附郭在河北諸郡中號繁劇公下車訪民間疾苦釐剔弊政文書數往復上憲

每屈意從之有控案速爲清理無一夕稽彰人立生祠以祀言及輒額手曰青天青天云五年擢守泉州泉瀕海通市泊稱饒富公宰中州素以清節著及至泉屬縣皆斂踪四境肅然縣尹某爲閣臣姪每上謁輒漫假叔命通寒溫公意其驕縱密察之果積有贓私因具揭視其職遂以此受知

聖主不一年簡授興泉海防副使當是時公一縣令耳甫蒙榮擢卽內忤朝貴禍慮不測及

命下輿論翕然嘉公之彈擊無所避而直道容於清時也抵任數月以疾告歸家居十載日事講學公璫爲同

邑胡氏胡氏自統三先生以進士起家喆嗣庭尤遠於姚江之學公之學得之胡氏居多嘗曰是非之心爲明明德真路頭毋自欺三字乃喫緊工夫數語極得姚江宗旨而亦不謬於程朱今

皇上御極之四年起四川驛傳鹽茶道遷松茂永甯道時制府尹公會勘金沙江一見卽稱爲理學經濟體用兼優之材未幾卒於官著有省克引一卷家訓數十則在蜀時有社學鄉約條規已刊行卒後家無餘積子孫多業儒有清白稱公字爾爵號六菴學者稱六菴先生贊曰予外大父柳溪先生與六菴先生俱汾邑耆宿晚

年同歸林下址相望一月月數宴會如香山洛社故事今距二公之歿幾三十年長老猶亟稱二公曩時敝車羸馬閭巷過從狀蓋絕不知其爲當世貴人也

書巢先生傳 卞爾琬

先生魏姓諱國正字衡如一字順夫別號書巢汾陽人尊甫贈公以積著起家舉二子長國卿字錫命號梅軒次卽先生先生少兄十五歲父歿依兄以居邑人孔先生攷者名宿也綿上范總戎毓奇官真定延孔先生爲兒師兄梅軒遣先生從之學孔先生嘗曰魏生文章雋品當求之正嘉慶歷間近時無其匹也年十七歸應童

子試輒冠一軍丁嫡母憂服除補邑弟子員豐潤魏郡伯元樞以名進士來守汾振興文教擇高才生肄業西河書院月爲第甲乙每榜發必首先先生賞鑒嘖嘖不置口兄梅軒以事被誣先生積憂不食者數日然每值書院文期輒勉出應命魏訝其文思窘於往時將戒諭之召至已羸尫無人狀乃笑曰而憂而兄耶胡一日至此因謂諸生曰是子天性孝友殆文而優於行者事遂解由是益愛重先生解組歸與叙譜誼而去嗣是書院山長蒲縣王翰編居正沁州張侍御孝捏兩君知先主國士皆厚遇之而翰編君爲尤契汾上不事音律之學間

有爲五七字者粗知趨韻而已樂府及歌行雜體老儒多不解翰編君官清華久屢操選政自唐宋逮黃初建安而上盡窺秘妙顧後進無可與言者得先生與之討論恒竟夕不倦時先生方年少爲諸生鄉先達及當道爭爲延譽文名廣播遠近以不識面爲恨一篇出傳抄殆遍而兄梅軒又雅不自信以先生撰述郵致京師質之輦下鉅公以資論定其已鈔板行世者蓋哀然成集矣壬申本省鄉試中式鄉墨三藝經生家奉爲寶後顧先生雖優於文然名場中最爲迤邐少與程君紹洙爲友才名相伯仲程提南宮而先生猶困諸生旣舉於鄉

曹君慕堂呂君學三皆鄉前輩與先生結文社每成一
藝輒驚嘆爲莫及甲戌公車北上兩君高捷先生僅以
明通謁選得襄垣教諭丁生母憂未赴至丁丑始成進
士冀預館選卒不得志以歸縱情詩酒頽然自放無復
名場志矣雅喜宏獎士類後輩稍有才望皆願出門下
其年齒相若宿有聲名者以老友呼之曰夜延接戶外
屢常滿集中投贈唱和諸作可証也先生旣縱酒兼好
葉子戲又耽於奕卒以此自困晚年作止酒止賭止奕
三詩以自警然終不可救以乾隆三十二年卒年四十
三著有書巢遺稿

贊曰范史傳儒林班固崔駰爲東漢首稱兩人俱不獲
遐福唐書稱裴行儉善知人王楊盧駱皆惜其福薄惟
楊差勝終於臨川尉先生爲吾汾文章鉅手不獲長年
又舉子數不育懷伯道之憂而歿友人命蹇自古嘆之
諒哉

翠亭先生傳

曹錫齡

先生卞姓諱爾琬字玉光翠亭其號世居汾陽小相里
爲邑望族曾祖文郁諸生祖時宜侯銓知府父懷錦歲
貢生軍功議叙縣丞公由廩生中式乾隆三十三年本
省第二名舉人授聞喜教諭嘉慶十年年八十會試蒙

欽賜翰林院檢討銜予時方官京師爲乞石殿撰
韞玉題其門曰太史第爲老而好學勸云公性淳篤持
身接物一以樸誠自矢家素封業鹽津門爲人所誤拖
欠國課幾至不測賴公維持以免於難早年蜚聲黌序
屢列前茅試牘如汾水考郭林宗傳諸作尤膾炙人口
已丑會試文已入彀以小疵被遺大興朱竹君先生深
爲惋惜立教以敦行爲本秉鐸聞喜課士多所成就如
內閣中書席君尙清進士宋君宜福李君若璋孝廉孫
君興文副貢李君學成優貢楊君鶴皆有聞於時故八
十壽時庠士尙有不辭跋涉而來者惠則有孚信哉嘗

憶其公車北上主予家與余論讀易法余曰懼以終始
其要无咎又論四書大義余曰明善復初學始真心心
相印只求仁君深以爲然著有敦古齋文集以嘉慶十
八年卒年八十八

論曰余束髮受書卽耳先生名先生讀書刻苦制舉業
包孕宏遠卓然名家一藝出土林矜爲枕秘顧久困公
車艱於一遇迨觀其晚節壽考康強卒以文字結
主知子孫林立克紹家學彼蒼之報施固不爽爾

顯慶寺修葺采畫記

曹祝齡

顯慶寺舊碑稱創自唐代明隆慶初燬於兵嗣是重修

者屢矣歲久復就頽圯嘉慶辛酉邑人張君毓慨思興
葺住持元佩相與贊成於是張君捐重貲元佩復與里
人轉募四方殘損者補之剝落者新之莊嚴佛像采畫
棟楹雲隱翬飛煥然改觀余於甲子之春偕姪汝勤瞻
禮寶刹入門古樹槎枒鐘聲鏗爾周覽形勝搜剔碑碣
寺之東北宋狄武襄公墓在焉繞墓桃花數十株豐碑
峙於東王岐公撰文宋次道學士書丹其南祠堂三楹
塑公像憶乾隆癸丑偕兄受之與二三父老議建碑亭
以庇風雨旣而不果迄今又十載餘矣歲月易逝善事
難成慨念先民怒焉如擣寺樓貯全部藏經啟櫝則排

比巖整卷帙犁然吾汾古刹十餘皆收貯全藏大都殘
缺弗全度閣亦不合法於此見住持之能尊經而有功
浮屠氏也亦可嘉矣在昔如來之垂教也大悲願力普
度衆生住世四十九年說法恒河沙數經之所在天龍
護持靜觀世界徧地光明苟能潛心內典闡揚聖教俾
宇宙多一善人斯宇宙消一戾氣善氣充盈戾氣消滅
將見人民和樂年穀順成於以享太平之福而遊郅治
之世也豈不盛哉爰述斯語勒諸樂石一以警衆僧勤
護持之功一以告來者發好善之念

重修崇勝寺七佛殿碑記

曹祝齡

自梁武帝時旃檀佛像入中國厥後由南而北歷代供養香火之盛未嘗一日輟我

朝特建宏仁寺於神武門外

大內移像供奉

上時詣寺頂禮京師僉稱旃檀寺者也然則七世如來自無始劫來普度天人恩施廣博準諸報本之誠尤宜亟亟吾汾大相里崇勝寺創始於北齊天保三載而七佛殿則明萬歷二十年樊公友父子所建北齊碑今在毗盧殿廡下西偏高四尺許鐫佛像三層兩側及下方皆題名碑陰有文併頌一通雖漫漶尚可讀康熙間顧

甯人朱竹垞兩先生皆嘗摩挲其下顧氏載入金石文字記余於乾隆戊申奉先宗丞靈輻旋里暇日與兄受之瞻禮慈容坐卧碑下低徊不忍去嘉慶壬戌解組歸自京師越歲癸亥里人及住持發願重修七佛殿七楹凡糜金若干兩幾閱月而工竣屬以文記其事且爲之贊贊曰

佛說衆生不能解脫皆執我愛輪轉生死愛心一熾金銀錢穀衣服器皿種種戀著隨處尋求而不得輒相詬鬥由愛生貪由貪生嗔由嗔生癡顛倒墮落無有出期是故當知棄愛樂舍近自一身六根四大一切幻合

無不可舍何況財寶真是外物若能以此方便布施如
棄瓦礫而獲髻珠脫離煩惱得清淨樂是大因緣亦不
可著我無所募彼無所施當知佛性無彼我故不得執
又有非著無當知佛性泯有無故若由喜舍永斷愛根
見清淨性卽見七佛

吏科給事中定軒曹府君傳

錢東垣

府君姓曹氏諱錫齡字受之定軒其別號也山西汾陽
人先代俱讀書潛德弗耀自其考宗丞公墓堂先生以
名進士入翰林官躋三品碩學懋德表率後進一時承
其風者頑廉懦立先生與弟申之戶部仰受庭訓先後

以進士起家先生由翰林院庶吉士授職編修洊擢御
史遷戶科給事轉吏科壬申歲以目疾假歸優游林下
者又將十年而歿春秋八十有一朝籍紳士枌榆宗鄣
聞老成耆碩之凋謝咸痛惜之先生之官翰林也曾於
乾隆庚子科爲四川鄉試正主考閱數歲又提督雲南
學政三載釐定文體以清真雅正爲宗兩省文風爲之
一變其所遴拔皆單寒之士厥後官清要勵風節操守
者指不勝屈其任臺諫也恭遇

堯舜之世綱紀振飭將順未遑上章啟

沃不以操切爲事搏擊立名而正言侃侃實足以培養

國家之元氣如奏請祈雨齋戒日停止立決人犯之予
勾辛酉歲京城歲歉奏請增設粥廠及散給棧流所餘
衣又有奏請修理國子監南學奏請慎重軍機關防等
摺皆奉

俞旨施行蓋其學有蘊蓄故施之行事能見其大如此
幼受業於大興朱笥河先生及詹事世父所學能端趨
嚮尤邃於周易數十年玩詞觀象寒暑弗少輟會集諸
家之說而斷以己意成周易集粹四卷於詩不多作而
友朋贈答山水登臨述今弔古興之所至抽妍騁秘有
專門名家或不能及者文則紆徐含蓄曲而有直體成

翠微山房詩文集若干卷宗丞公嘗於都中設掩骼會
及修建山右三忠祠三晉會館并於楊忠愍故宅建松
筠菴先生服官後倡捐掩骼義田及修整三忠祠等廟
字承先之志始終勿懈晚年自號聞海謂聞字之義有
聞所已聞聞所未聞聞所當聞聞所欲聞聞所畏聞聞
所惡聞惟求多聞惟恐有聞聞善則喜聞惡則懼聞難
則救聞過則改聞人之惡毋暴其惡勸之使改聞人之
善急彰其善引之使進聞之爲道洋洋大哉識者謂其
見道焉事二親曲盡孝道篤於友愛與弟申之戶部白
首相愛怡怡如少時喜周人急力之所能勿憚勞怨親

族有譽面規戒之辭嚴義正當時其人幾若難受然誘之俾至於善或且隱爲之地由是人多改過自宗丞公翰苑通籍先生暨其次嗣汝淵繼之三世詞館爲玉堂中罕有之事人咸謂宗丞公及先生厚德之報可爲榮已元配耿恭人繼配馮恭人皆名門女溫恭肅慎先卒子五汝淳太學生貤贈刑部主事汝淵己未進士涇州知州俱先卒汝淦戊寅科舉人長子教諭汝藻附監生先卒汝淳太學生孫男十人樹蕃樹寶樹本樹實樹棨樹枋樹棠樹槐樹榛樹典 論曰昔司馬文正公以誠實不欺爲宋名臣嘗言某無他過人之處惟生平於事

無不可對人言耳人謂公之大經濟大學問卽從此出先生里居與涑水匪遙而一生樸誠不欺若是殆聞文正公之風而興起歟文正公身爲宰輔勲在宗社澤遍蒼黎而先生官止給諫尙未盡抒其抱負者蓋亦有遇有不遇焉先生於詹事世父爲年家子爲入室弟子予與先生之次嗣又爲鄉薦同年其年少之郎君復受業於予適館授餐者將踰十稔孔李之交真成世世諸郎君謂予於先生朝夕薰炙最久性情之篤摯學問之純粹實一一親見之知先生者惟予爲獨深遂詳次其實事以爲之傳

戶部郎中曹鏡源先生墓表 宋其沅

先生曹姓諱祝齡字申之號鏡源山西汾陽人曾祖應璽祖曰英俱

贈通議大夫父學雍廣西懷遠典史以先生官

贈中憲大夫妣譚

贈恭人本生父學閔乾隆甲戌進士官宗人府府丞懷遠公卒先生以父命爲叔父後仍隨侍京邸宗丞公課子嚴父執大興朱竹君嘉定錢辛楣兩先生皆博學能文有名當世先生前後從之遊由是學大進乾隆庚寅舉順天鄉試充四庫全書館校錄議叙知縣不就己酉

會試成進士以主事用戶部河南司行走是年充順天鄉試內收掌庚戌兼福建司事壬子奏留本部候補嘉慶丙辰充會試彌封官丁巳管捐納房事充則例館纂修兼督催所戊午補山東司主事庚申升江南司員外郎兼理八旗現審處再充則例館纂修辛酉充順天鄉試同考官升陝西司郎中壬戌請假回籍自是不復出山矣當是時伯兄定軒給諫掌戶垣給諫子汝淵由庶常授刑部主事兄弟父子同列清班先生方以賢能著聲農部且精力強健華臚固不難立致乃翩然引去無一毫遲戀心世第嘆先生之急流勇退而不知其鄙榮

利尚恬淡蓋天性然也既歸浮大江而南覽餘杭山水之勝東謁岱岳登日觀五十餘盤攀陟殆遍汾上百里之內北則卜山南則介山屢攜客登眺賦詩用紀遊蹟而足跡從不一履城市築生雲精舍焚香靜坐有時書聲琅琅達戶外或扶筇戴笠徜徉郊野與父老話桑麻談孝弟怡怡如也嘗作書誠諸子曰余自賦遂初積俸金購田若干畝子孫耕種衣食粗足昔人詩云清白家聲無我愧詩書世業要人擔勉之又曰日中則昃月盈則虧吾家鼎盛於今周甲持盈保泰其可忽諸臨歿復書遺訓曰立品端基謙和處世多言必失數動則凶觀

此數端前賢格論何以尙茲嗚呼先生之文章雖高掇科名而未獲顯於世先生之事業雖畧著郎署而未足盡其才惟是進退出處脫然無累處盛滿而志不驕當耆老而精不懈承先澤而遺後人者固已至深且遠而十餘年來以鄉先達表率後進爲鄉之人所矜式其流風餘韻足令人思之不置也卒於乙亥五月十三日年六十九配宋恭人先大父奉政公長女四德克修治家從容而整肅誕子三汝瀾附監生先卒汝洵庚午舉人汝涵監生女一適舉人馬書翰先卒先生既葬之明年夏汝洵等以書至京師乞余文表於墓書未達而汝洵

遺疾遽卒未幾恭人亦卒年六十九距先生之歿歲始一週可傷也已。是年八月汝涵暨嫡孫樹穀奉柩合葬先生於成家莊先塋又以書報余因並述之俾揭於阡

重修汾州府學記

汾州府知府雷注度

汾郡學之移建創始於前守郎公踵而成事者劉公閱六十載而前守史公復鼎新之迄今又五十餘年矣中間踐履迭更久暫非一率皆逆旅傳舍其官而學宮之興廢未或過而問也夫人居處宮室慮風日之不蔽猶望後人塗茨垣墉以時苦葺况煌煌聖人之居士林習禮講藝之所聽其傾圮剝落於積日歷歲之久非特不

足以耀文采大觀瞻而

先師之靈爽不安則守土

者之心何以卽安余以乙未冬蒞治涓吉謁廟顧瞻徘徊見殿堂兩廡之間木朽而石泐旁舍鞠爲茂草慨思繕葺計費數千緡如召集郡紳士耆老議捐助非不易辦而集事顧吾方務與民休息而以此重煩吾民其不至勞生怨怨生謗者幾何於是不謀衆庶自籌經費擇郡中一二廉幹者董其役汾陽陳令則稽考出入一切物料悉以時價工匠亦視民僱予直以故工不知勞民不知費凡五閱月而潰於成其規制視昔無異而加甃甃峻整圯墁增葺度幾妥几筵隆享祀而不傷民之力

與財於余心始可以差慰也雖然天下事經始難善後尤難前此五十年史君之修之也崇闕雕拱危垣文陛盡一時丹雘之觀謂可焜耀數世矣乃幾何時而頽廢凋落不無藉於後人之增修設過此數十年而扶植者傾壞補苴者滲漏增新飾舊不至重累吾民不止且以物成之之易毀也閱時而更新用宏而工鉅隨時而補葺費少而功多吾爲久遠計詢諸學博舊有學田若干畝檄委虞尉履畝稽查鈎稽隱匿酌增租額以儲歲修之資而以其餘稱貸出息又以其餘撥西河書院廣學舍增膏火計不出十年可收倍息無筭卽捐歲修之費無筭而書院亦藉津潤焉夫西河相傳爲卜子夏設教之地文學肇興固洙泗之衍澤鄒魯之遺風也則所以暢餘波而廣風教倘亦 夫子在天之靈所鑒余衷而昭格者哉廟工之成例得詳書本末因志所以不擾吾民之意並及措施善後之方勒諸貞石以告來者其地畝段落租額別刻碑陰

重修汾州府學記

汾州府知府
史夢蛟

西河郡學始建於郡城之東南隅自

國朝定鼎順

治十七年移建於同節坊規模宏敞棟宇軒昂明慶成王故第基址也而舊郡學改爲汾陽縣學康熙雍正乾

隆年間類爲修葺廟貌維新至道光二年歲在壬午已歷四十餘年之久風雨摧殘垣墉剝蝕堂廡幾無完宇時郡博請於前守予同鄉梅村余君名永齡倡議捐修謀及紳士諸生共襄厥事工未及半梅村解組歸田漁陽象君思齋名會來視事復命諸生踵而成之而是時廟工紛作集貲維艱乃取學田餘租與息錢之在典肆者季增而月益之工有作輟故遲久而始竣庚寅冬余下車謁廟仰見數仞宮墻煥然美富旣喜前守尊師育才之意亦嘉諸生之拮据從事務底於有成者其勞均不可沒也故勒石而爲之記道光十三年九月

重修汾陽縣文廟記

汾陽知縣
林濬源

記曰君子如欲化民成俗其必由學乎是以自古帝王建國君民教學爲先尙矣我朝列聖相承稽

古右文崇儒重道間歲復

臨雍釋奠爲天下先二

百年來人文蔚起薄海內外罔不爭自濯磨以仰副我

皇上壽考作人棧樸菁莪之至意猗歟休哉隆古

以來未嘗有也汾邑學宮代爲州學國初別爲縣當

是時邑侯崔君秉政大加修葺備極偉麗詳載邑乘乾

隆三十八年復經邑侯李君文起補修自時厥後漸就

傾圮邇來坍塌益甚當事者怒焉傷之而未遑也

皇帝御極之元年邑侯大興王公世棠司諭白公燦司訓毛公應豐首議修葺紳士翕然從風未幾王公讀禮去二年春濬源奉檄來宰是邑都人士益加踴躍前後得捐募金累萬鳩工庀材諸生皆敬事無曠堂哉皇哉閱今歲而告厥成功是役也經始於道光元年夏五月歲於四年之夏六月名雖重修實同創始廟貌聿新春秋匪懈嗚呼盛哉抑程子有言曰治天下以正風俗得賢才爲本學校之設意在斯乎若夫大學齊治均平之道修己治人之方所以明人倫崇正學者具見於歐曾諸大家學記中可覆按也故不復贅夫前事不忘後事

之師也書以記之不特後之人有所考鏡亦使諸生知幸際休明涵泳聖涯咀味道妙益當勉爲忠孝以無負聖天子興立學校之意則王道四達而不悖矣於是乎書

新修汾陽縣城隍廟記

汾陽知縣陳訓

汾邑城隍廟創建於前明中葉迭經兵燹廢壞不支入本朝百餘年屢事修葺而有碑可考者僅見於雍正丁未前令周公一舉迄今又五十餘年矣乾隆壬辰余奉簡來晉明年癸巳蒞茲土每朔望入廟見風雨剝蝕無以妥吾神而安厥居顧案牘糾紛未遑經理越三

載獄訟稍簡民與令頗覺相安乃慨思修復捐索三百
餘緡庇材鳩工丁酉仲秋經始逾數月告竣殿宇儻牆
壁整而余旋調任平遙謁廟告卸徘徊瞻矚顧而慮之
不可不勒石以紀俾後之蒞斯土者踵而修之未未勿
替也余維城隍尊神與邑宰分幽明而治均有守土之
責而神之權尤重其威福亦最靈蓋神秉聰明正直之
德統億兆人民之衆呼吸通帝之載黜陟奉三無私見
夫風俗淳茂善氣薰蒸則賜之和風甘雨俾年穀順成
疵癘不作是神之奉天行慶也或桀驚成性戾氣干和
則降之水旱疾疫不得以生以養而康而壽是神之奉

天行罰也且士人服古入官膺民社寄禮先宿廟自誓
政治之得失宅衷之仁暴吾神罔不鑒觀而默察之何
者可以盟心不欺何者可以臨民不愧何者可以質諸
神而無憾罔時怨而罔時恫勿予禍而勿予謫神之力
也而實人之所自爲也然則潔齋肅所以邀惠於神
者寧僅蚩蚩之氓所當儆惕其耳目而洒濯其心思哉
余治汾六載於茲自愧德薄能鮮不足感召神庥而幸
此一方民諒予樸誠無甚作奸犯科以撓吾法得非神
之陰相吾民俾無獲戾並使吾得以報政而去毋招謗
咎官民均有賴焉况如今歲春夏間雨水失調米穀翔

賈民情洶洶幾有不終日之勢長至後忽叠沛甘澍回
蘇起稿不崇朝而普徧又豈非仰神明福佑夙夜爲民
請命始克回天心而降膏澤與今於廟工之成例得紀
其年月畧舉顛末推本於神之所以福斯民與吾之所
以邀貺於神者並書而刻之於石俾知敬鬼神而勤民
均蒞斯土者之要務云乾隆四十三年六月

重修汾陽縣城隍廟記

汾陽知縣
楊文瑾

汾陽城隍廟其創建始末與歷代補修各有碑記可攷
無庸贅述但城隍之神實與邑宰治分幽明而別善惡
察災祥呼吸相通保護之理則一也辛酉年余奉簡來

晉初任甯鄉閩六年調汾邑每朔望謁廟見殿宇摧殘
兩廊剝落竊念無以安吾神卽無以安吾心實守斯土
者之責也第以年來案牘勞形未遑經始今蒞茲三載
矣退食之餘慨思補葺乃多方化導共積三千餘金鳩
工庇材又於樂樓左右添建鐘鼓二樓石欄迴繞棟桷
飛翬前後增添者不一興工於乙亥八月告成於丁丑
七月較向謁廟時頗爲改觀從茲四境安謐民和年豐
未始非神庥之永護也後之蒞斯土者踵事增修永乖
勿替則余尤有厚望焉嘉慶二十二年七月

重修大相里村卜山書院碑記

汾州府知
府牛鎮

汾郡治北大相里村有卜子祠志載建自有元勅額卜
山書院歷年久遠屢經修葺彼鄉人士以時祀享迄於
今不衰其景仰之誠洵可尙已夷考其跡前人頗多疑
議惟郡人曹慕堂宗丞據史記正義以爲西河卽今汾
州證以元和郡縣志反覆辨論謂子夏之教授於此無
疑余見聞渺淺鮮所攷證以私意度之其說似有可信
蓋古來神聖賢人衆矣何獨借重於卜子西河之地廣
矣何獨表跡於謁泉又况孝義有墓平遙介休皆附以
田段二子爲三賢祠此外所稱子夏祠者村里中往往
有之使屬後人之鑿空恐不能傳信至於如斯也獨是

魏都安邑距汾州七百餘里其在文侯尊賢好士旣已
師事之胡不奉以賓館置之左右顧任其遠居教授數
百里之外其在子夏得時行道胡不出所懷抱舉而措
之顧甘於肥遯匿跡於幽巖石室間是則不可以私意
測度者已要之人性好善每於名賢舊蹟雖一物一器
亦必多方表著引爲增重矧大賢遊歷之所其存神過
化大有禪於風教者顧可不相與維持於勿壞也哉丙
午夏祠中司事人曹明府汝淦卜學博世樞等以歲久
傾圯亟宜重修啟余爲首倡余嘉其好善之誠爲之捐
俸以助之其開列工程則於正殿兩旁增設田段諸賢

祠以隆配饗因敦詩習禮兩廡地皆湫隘今以來塏更之舊有四明亭魚池等所皆久廢無存爲之營建復其故環堵九十六丈有奇舊係土築茲改甃以甃甬道三十餘丈改作石砌一律平坦共估需工料銀若干兩再閱月而告成屬余爲記因爲述前人之論說而紀其工修之梗概總以見彼鄉人士風俗醇美慕義嗜學之心至誠且篤云爾道光二十七年六月

誥授資政大夫福建巡撫韓公墓誌銘

彭邦嘯

汾陽韓公歿於京寓之明年其孤鈔元鍵將奉匱歸葬先期次公事狀踵余門述遺言以志石之文相屬予遜

謝弗遑顧念先文勤公掌翰林院公以嘉慶己未庚申間值清祕堂間數日輒詣先公白事予時甫弱冠揖公於衆賓後識公爲最早逮後解組浮寓春明不二年公亦罷官僑居相近長安冠蓋如雲惟兩閒人者朝夕過從因得從公縱論天下事所得良多是知公莫予若也不敢辭謹按狀公諱克均字德嶷號芸舫系出宋魏國忠獻公後傳十二世由相州遷山西之文水又九世乃徙居汾陽故公世爲汾陽人曾祖謨知廣東肇慶府祖衍桐乾隆辛酉拔貢庚午辛未聯捷進士歷知河南陝州考燮三世皆以公貴

諸贈資政大夫妣皆

諸贈太夫人公生而穎異至性過人六歲遭母夫人喪
又二年贈公亦下世哀毀如成人自是隨世父浥滄公
官署又依外王父北平杏浦李公任所若閩若吳若豫
章若楚南北咸至焉公念少孤刻苦勤學雖奔走道路
不爲稍輟最後杏浦公官兵部侍郎從入都遂以乾隆
五十三年舉京兆試嘉慶元年成進士改庶吉士四年
散館授檢討五年充貴州鄉試正考官又於壬戌乙丑
疊充會試同考官所得多知名士如寶應朱文定公其
最著者九年授湖廣道監察御史十一年掌京畿道事

時編輯

高宗純皇帝實錄至是提調乏人故事以翰林官充他
職不預館臣以公熟諳掌故特奏充焉誠異數也是年
九月擢工科給事中恭送

實錄尊藏於陪都差旋蒙

恩以四品京堂用十三年巡視通州漕務十四年授浙
江溫處道十九年授河南按察使旋調雲南按察使二
十一年授安徽布政使二十四年授貴州巡撫旋調福
建巡撫二十五年

今上御極十二月調雲南巡撫道光五年復調福建巡

汾陽縣志 卷十三 藝文
撫公起家文學既歷外任遂以才見知故屢鎮皆邊陲
重地國家恃以爲安其在滇御外藩最爲得體思某屬
車里宣慰司與夷接壤會奸徒構讐孟艮緬目名召布
素者誘執土司刀繩武公卽檄諭緬夷以夷目擅執內
地土司肇衅宜聲罪致討姑念國主遠處阿瓦未必知
情當遣所屬護還並檄暹羅南掌各輯邊境毋生事端
緬甸奉檄卽以繩武來歸夷人自此震讐爲永北大姚
夷因土田事與內地構怨公於懲創之後酌定章程邊
圉永謐前後兩任八閩值海氛旣靖興利除弊民氣以
復閩省軍械庫向附郭公始奏請移建城中臺灣府屬
淡水廳土城年久傾圮公命改建石城且捐貲先倡屹
然稱險固歲饑弛海禁以便民濬福州之小西湖修莆
田縣之木蘭坡不惜鉅費功利甚溥在滇則奏請疏滇
池改東川府會澤縣石橋爲渡船其他惠民之政不可
殫述道光十年蒙

恩予原品休致公遂居京師優游林下者十年神明如
少壯時至是偶疾遂不起公貌秀偉眚目如畫所至不
爲矯激異同之見而聲望卓然未及年而遽得讞天固
以是優公而公亦以自得然自公去閩未幾而臺灣有
張丙之役論者至今乃益思公云性純孝以祿養不逮

遇諱日及晉秩告祭必盡哀與弟賓賢垂老無間其歿也公屬予執之予爲作聯語云國爾可忘家兄得專心緣有弟友于亦爲政老思拊背竟無人蓋紀實也其他睦宗親恤寒畯以大節觀之皆其所宜有者初公與無錫孫文靖公共事有年文靖之墓陳恭甫前輩誌之纒纒萬餘言公嘗語予議其太冗故今誌公墓不敢爲溢辭公生於乾隆丙戌年十一月初五日午時卒於道光庚子年十月二十八日辰時年七十五配徐夫人本性李氏爲北平乾隆壬戌進士廣東糧儲道璧齋公孫女湖南武岡州州同晴川公女幼育於舅氏戶部郎中徐皓亭公家遂姓徐氏先公十二年卒子二長鈔公從子入繼爲公後道光元年

恩廕通判改捐郎中分刑部迴避改工部次元鍵國學生孫八人孫女三人將以辛丑年日月合葬城北牌樓凹新阡銘曰

國有成憲置臣是持法苟不撓威豈遂隳赫赫中土守在四夷將鎮撫之敢曰羈縻於惟我公張弛得宜緬懷曩哲經略西陲美徵世濟前光後輝卽論晚節曾不少差新阡鬱鬱公其樂茲我文紀實或無愧辭

誥授資政大夫護理浙江巡撫兼護浙江學政浙江

布政使宋公墓誌銘

祁壽藻

公姓宋氏

諱

其沅字湘颺山西汾陽人曾祖士哲增貢

生祖國珪候選州同知父毓錫歲貢生俱以公貴 贈

通奉大夫公具異稟年十四補縣學生抽黜五經不誤

一字十六試高等食廩餼洎歲戊午年十有九矣鄉試

中式第八名己未會試中式第九十六名 朝考入選

改主事籤分禮部癸亥以承辦 孝淑睿皇后奉

安事宜奏稿沿襲舊謬嚴議鐫職臬奉安禮成

恩賞七品小京官未幾部薦仍以主事候補壬申補主

客司主事己卯升祠祭司員外郎兼和聲署署正庚辰

升儀制司郎中轉湖廣道御史協理京畿道嗣丁內艱

服闋乙酉補福建道御史掌京畿道事轉刑科給事中

丁亥轉兵科掌印給事中此公京官二十餘年之大畧

也公嫻典禮通知掌故凡充會典館分校兼協修學政

全書館纂修則例館纂修總纂 大清通禮館提調臺

規館總纂皆能研稽案牘綜覈舊聞勒成一代之制歲

丙子暎咭喇入貢隨禮部尙書穆公使通州戊寅充陝

西考官辛巳充雲南考官壬午充順天鄉試同考官又

派稽查戶部緞疋庫者二稽查太平倉通州大運

西倉者各一監試武闈鄉試者一此又二十餘年奉差

出使大畧也公前在御史任 京察列一等呈母老請
留京供職及是科俸滿 記名以繁缺道員用未匝

月 特旨授浙江督糧道時道光八年九月也浙漕
自西運水手滋事之後旗丁愈困水手加橫公軫難戢
覈柔克剛克悉中窾會故閱四運無廢事十二年 擢
浙江鹽運使浙鹽之弊一由於引銷之不暢一由於正
雜之不分公爲條別款目清稽疏滯鑿然犁然罔或牽
溷大約引銷有盈絀而厯案率以全完入奏運庫本有
商存公項而向來遇格於開銷之款輒抽此充之致使
黠商巧借名目串蒙動領及一當籌撥轉須減價勸輸

始克報解經儲蓄力因是兩虧矣公蒞任極力振刷自
十三年春始至十四年冬止庫貯已實存七十餘萬兩
斯理財之效也十五年 擢廣西按察使十八年 擢
浙江布政使會夷事起總理軍需局二十年六月定海
陷撫臣罷職公奉 命護撫篆又值學政以憂去兼

署學政事八月浙江鄉試充監臨文書填委雖闔中治
公牘亦恒至丙夜積勞積憤神思瘁矣十八日聞事畢
卽馳赴甯波中途膺寒疾輻行不輟廿一日接太府知
照應俟庶東查辦確耗再議剿撫公前使通州頗洞夷
情知其莖謀久必不遽甘受撫於是力疾土書其大要

曰定海現被占據情形叵測 天朝之威不宜貶損
一也夷事因禁烟而起藉詞通商必夾帶烟土流弊不
堪設想二也各國朝貢固由懷德非不畏威若 天
討未申濫議通好恐諸夷皆有輕視中國之心邊衅方
深外患無已三也浙人素性好義觀此猖獗愈思敵愾
乘時進兵止須賞罰信獎勵優即可歲事若曠日持久
待至粵中不能了局定海始議攻剿軍心已怠驅策不
前四也嘗是時人心惶惑聞公言稍稍定而公之疾乃
日增劇至二十六日酉時歿於甯波軍營距生於乾隆
四十五年正月初一日午時年六十有一嗚呼使公及

見此後逆夷之鴟張其感憤將復何如公惠鄉睦族之
事纍纍人口茲不舉舉其行已服官之大者配劉夫人
繼配張夫人子一成榷通政司知事孫五維燾維炅維
炆維燮維煩曾孫一立官成榷將以二十二年月日奉
公柩與元配劉夫人合葬城西栗家莊慶成原新阡請
銘於窆藻銘曰

海水初飛孰回其瀾餒鯨長波孰司其權公韜遠慮嶽
嶽榮榮操券尊俎意固而完惟 聖仗公用壯屏藩

大星倏實理恨幽巖鄉情孔鬱我思孔酸勒詞貞珉敢
告史官

救贈儒林郎晴江曹公暨元配賈太安人合祔墓記

曹樹穀

先贈公既歿之五十五年吾母太安人考終里第明年
己酉三月二十九日合祔杜家莊先阡樹穀伏處衡茅
既不能奔走干謁求當代大人先生之文用光泉壤復
恥沿世俗借銜陋習誣我先人謹案自漢魯叡爲父峻
立碑金石家循其例子孫誌先世墓見唐宋人別集者
甚夥茲排次事狀乞吾友同邑李西樵孝廉榮達書石
併填家諱而納諸壙曰公曹姓諱汝瀾字振齋一字晴
江世爲汾陽望族曾祖諱曰英諸生祖諱學雍廣西懷

遠典史本生祖諱學閔宗人府丞父諱祝齡戶部郎中
妣宋恭人戶部公三子公居長未冠補縣學生尋入太
學再試京兆未售卒於京邸元配吾母氏賈同邑捐職
州同知諱鎮女年十六來歸二十一而寡五十二撫部
長白福公綿以節孝請旌於朝六十膺太安人之

封樹穀生五月而孤以未逮事先贈公爲大戚太安人
泣然語之曰汝曾大父及大父相繼官京朝喜招致四
方知名士汝父學琴於江右蕭鳳竹學詩於武進呂星
垣學書於六安陳球皆妙叅神解爲前輩所器重其敏
悟博通衆藝如此又曰汝大父庭訓嚴尤注意經學汝

父於諸經沈酣往復力求精熟夜深自塾歸就佛燈默
寫成帙再三溫繹汝大父退衙後廣坐中對客輒令覆
誦所習聲琅琅如瓶瀉水其攻苦博堂上歡又如此因
檢所鈔書授樹穀相向哭失聲先贈公之卽世也太安
人號踊絕而蘇者再誓以身殉既而奉舅姑命撫孤故
不死性端毅通書史居恒整齊嚴肅篤老不懈生長世
閱衣粗茹淡無華綺之習然見理明決臨事務持大體
歲壬辰汾上霜災告飢捐米放賑一鄉賴以安堵壬寅
六月海疆不靖各省搢紳助餉議起慨然斥簪珥得二
百金以饋軍曹氏宗祠就圮首倡鼎新與宗老定祭禮

置祭田立合食法永昭法守生平敦尚名義識者謂有
士大夫風槩拊其孤樹穀慈而有法俾勵志讀書不事
俗學疾旣革戒之曰死生如晝夜吾以踰七望八之年
獲從汝父於地下亦復何憾惟是附身附棺汝宜悉心
料檢成殮時慎勿假手於人禮經言婦人不死於男子
之手汝其毋忽嗚呼當彌留之際猶垂慮及是太安人
之志節自信於平時者可知而先贈公績學早世亦可
以告慰於九原矣先贈公生乾隆三十七年二月十五
日卒乾隆五十九年四月二十七日年二十三太安人
生乾隆三十九年六月初八日卒道光二十八年十月

汾陽縣志卷十三
初七日元善軍功議叙九品銜已酉正月男樹穀謹撰

尙義樂施碑跋

曹樹穀

右碑元至正十年二月建在郡城北十八里大相村樊氏塋正書前列鄉貢進士張訥撰嘉議大夫山北遼東道肅政廉訪使呂蒙甫書榮祿大夫集賢院大學士馮公勵題額按元史選舉志不載鄉貢進士而文宗紀天歷元年載廉訪司書吏參用鄉貢進士格例蓋當時各行省中式鄉試者之稱百官志榮祿大夫文散官從一品嘉議大夫正四品集賢院掌提調學校徵求隱逸召

集賢良大學士二員正二品廉訪使每道二員正三品山北遼東道在內八道數內隸御史臺蒙甫乃邑人呂簡肅公澆之字惠宗朝陽曲馮思溫馮恩皆嘗官集賢院大學士以簡肅書字之例推之公勵或卽兩馮君字與張訥未詳考記中自叙樊氏館客也碑載樊君宗禮至順庚午河南納粟賑荒堂除德安府稅使及歸里創建廟學二事碑云河北漢澠之間累歲薦饑廷議建納粟令以史證之文宗紀天歷二年夏四月河南廉訪司言河南府路兵旱民饑乞行人粟補官令食貨志入粟補官之制元初未嘗舉行天歷三年內外郡縣亢旱爲

災於是用太師蒼罕刺言舉行與碑合又食貨志入粟補官格江南陝西河南等處定爲三等依例納米河南二百石以上上等錢穀官百五十石以上中等錢穀官百石以上下等錢穀官元制諸路總管府十萬戶以上爲上府十萬戶以下爲下府餘爲散府樊君官德安府稅使德安隸江南省爲散府所授乃下等錢穀官應輸米百石以上也廟學謂卜山書院郡邑志皆稱樊宗英建宗英乃樊君伯兄殆樊君捐貲而歸美家督與卜山書院有至正十三年勅建碑一省部符文碑一俱剝落難辨按選舉志先儒過化之地名賢經行之所與好事

之家出錢穀贍學者並立爲書院設山長一員由集賢院及臺憲官舉充之後改以下第舉人充一考升散府中州教授又設直學掌錢穀從郡守及憲府官試補考滿升錄諭後改州吏此有元書院之定制也凡書院荆建大抵由士民陳請朝廷卽賜額設官以爲育材之所見於本紀者仁宗紀延祐二年京兆爲故儒臣許衡立魯齋書院泰定帝紀泰定一年置諫議書院於昌平祀唐劉蕡四年建橫渠書院於郟縣祀宋張載文宗紀天歷二年賜鳳翔府岐陽書院額祀周文憲王見於列傳者許有壬傳有壬父熙載仕長沙日設義學訓諸生既

歿而諸生思之爲立東岡書院王思誠傳起河間路總
管所轄景州廣川鎮漢董仲舒之里河間尊福鄉博士
毛萇舊居皆請建書院此類不可勝舉卜山書院亦屬
勅建而史失載景濂子充諸君子烏能辭踈漏之咎與
道光己酉樊君裔孫騰九文學抄是碑見示爰題其後

汾陽縣志卷之十四

藝文四

餞潞州陸長史再守汾州

唐 蘇頲

河尹政成期爲汾昔所推不榮三入地還美再臨時擁
傳雲初合聞鶯日正遲道旁多出餞別有吏民思

故西河郡杜太守輓歌三首

唐 王維

天上去西征雲中護北平生擒白馬將連破黑鵬營忽
見芻靈苦徒聞竹使榮空流左氏傳誰繼卜商名
返葬金符守同歸石窳妻卷衣悲畫翟持髮待鳴雞容
衛都人慘山川駟馬嘶猶聞隴上客相對哭征西

汾陽縣志 卷十四
塗芻去國門祕器出東園太守留金印夫人罷錦軒旌
旗轉哀木簫鼓上寒原墳樹應西靡長思魏闕恩

西河郡太原守張夫人輓歌

唐李岑

鵲印度仍傳魚軒寵莫先從夫元凱貴訓子孟軻賢龍
是雙歸日鷺非獨舞年衰勞今共盡悽愴社陵田

和李中丞訓萬年房署少府過汾州景雲觀因以寄

上 唐盧綸

顯晦澹無跡賢哉常晏如如何驚孤鶴忽乃傳雙魚叙
以泉石舊悵然風景餘低回青油幕夢寐白雲居玉洞
桂香滿雪壇松影疎沈思矚仙侶紆組正軍書積學早
成道感恩難遂初梅生諒多感歸止豈吾廬

送單于裴都護赴西河

唐崔灝

征馬去翩翩城秋月正圓單于莫近塞都護欲臨邊漢
驛通烟火胡沙乏井泉功成須獻捷未必去經年

送汾城王主簿

唐韋應物

少年初帶印汾上又經過芳草歸時徧情人故郡多禁
鐘春雨細宮樹野煙和相望東橋別微風起夕波

巫山縣汾州唐使君十八弟晏別兼諸公攜酒樂相

送率題小詩留於屋壁

唐杜甫

卧病巴東久今年強作歸故人猶遠謫茲日倍多違接

宴身兼杖聽歌淚滿衣諸公不相棄擁別借光輝

過宋員外之間舊莊

唐杜甫

宋公舊池館零落首陽阿枉道祇從入吟詩許更過
淹留問父老寂寞向山河更識將軍樹悲風日暮多

謝汾州田大夫寄茸氈葡萄

唐姚合

筐封紫葡萄筒卷白茸毛卧暖身應健含消齒免勞
衾衣疎不稱梨栗鄙難高曉起題詩報寒嘶滿筆毫

留題汾上舊居

唐薛能

鄉園一別五年歸迴首人間總禍機尙勝鄰翁常寂寞
敢嫌裘馬未輕肥塵顏不見應消落庭樹曾栽已合圍

難說累牽還却去可憐榆柳尙依依

懷汾上舊居

唐薛能

素汾千載傍吾家常境衡門對浣紗好事喜逢投宿客
刈田因得自生瓜山頭吹笛陰沈廟陌上新蒸突兀車
投暗作珠何所用被人專擬害靈蛇

題賀魯將軍祠

唐田肇

身歿中都將芳遺賀魯祠靈泉生馬足神宇構雲基
靈鷲潛離牖潺湲旋別池鶯啼沉谷靜華落茂林滋
巖草遊庭鹿清風嘯月鳴曾懷憂物志常赴惠人期
佑享朝懸樂精誠夙問龜將軍於此地灾福信無私

子夏祠

宋趙瞻

山因先師成令名人心仰止懸青真文侯北面疑山扁
石室至今猶南傾直松萬株天籟聲長材大棟資連甍
溪泉四出照骨清潤物功溥民罔爭朝兮新雲澤根莖
暮兮和風發勾萌山川氣稟天地英民何知爲夫子靈
魏最稱治由師經晉俗自是多諸生時尙辭華取未精
皓首學行徒修明非無神降弼王庭國朝嘗議平文衡
斯文未喪吾道亨商之傳授今可行

郭林宗故宅

宋趙瞻

悲哉漢末之人士虛名譁衆世皆靡姦邪憤怒相角觴
潰然天下黨錮起黨禁根剔密如此何歟網漏郭夫子
意在大儒照物理逆鑒禍福以行已才不蓋人行不詭
謙損涵納海之水又豈高卧安閭里鴻飛鳳舉不可企
前視亂國如覆軌明哲大雅之所美有道進退能猶是
故宅莫問但遺址然誰謂謂李元禮其徒器識不能爾

鶴鳴古洞

宋趙瞻

山勢嵯峨接遠峰九臯鶴唳徹長空清音彷彿蒼松外
疎影依稀皓月中石洞雲封仙去後桑田世換水流同
登臨厭聽黃鸝語弄巧綿蠻噪碧叢

文湖漁唱

宋趙瞻

湖光瀲灩泛蓮荷，欸乃漁郎慣此過。笛韻吹殘紅蓼岸，
櫓聲搖出錦鱗窩。狂歌明月閒愁少，放浪扁舟適興多。
蓴菜鱸魚供一醉，棹歌歸去卧煙蓑。

馬跑神泉

宋盧象

將軍稱賀魯遺廟，俯靈淵。螭噴蛟龍穴，波跳赤鯉泉路。
迴芹澗水村，近石林烟野。馬含暄氣，農夫出故躔。土膏
興耒耜，尸祝傍山巔。閱世無銘石，茲遊匪暮天。頃來規
下宇，必葺慕先賢。悅使成能事，掄材出俸錢。伉香推幹
蠱，班匠擇精專。黜聖何其麗，樂檀本自然。松青離石道，
雲白介山田。適歎飛輦速，仍憂黃雀穿。梨花寒食後，桂
籍酒樽前。饑麝尋香栢，流鶯助晚絃。吳歛摧玉笋，趙舞
落金鈿。上已無過酒，春衣試欲湔。故園思鞏洛，襖飲客
汾川。寄語西河老，鄉心朝暮懸。

謁狄武襄祠

金王鏞

傑士西河秀，英雄挺偉姿。奮身甘衛國，彌節願匡時。妙
略風雲會，威名草木知。功高懾南服，計重破西陲。定亂
勞三箭，平戎在一麾。勢傾銅柱遠，聲振玉關奇。頗牧才
何濟，孫吳譽竝馳。朝廷分重寄，將相賴兼資。豹畧多全
勝，鷹揚屢捷師。雍容敦禮樂，談笑屈熊羆。褒錫酬車服，
勲勞著鼎彝。雲臺儼冠劍，麟閣繪形儀。錦里家仍在，蘭

汾陽縣志 卷十四 藝文 五
陵塚不隳風號墳上木苔漬廟前碑過客煩詩句居人
奉酒卮汾陽遺美蹟千古話芳規

送二道者歸汾州 金許安仁

介休山下兩閒人來訪汾陽舊使君明日却歸塵外去
一雙白鶴上青雲

汾州北席里石氏節婦 元陳旅

北里高樓晝掩扉水銅光冷上苔衣寸心誓比南山石
汾水秋風鴈不歸

馬跑泉禱雨 明祝穎

山川出雲雨潤物固其功茲泉發祥久備載州乘中維
時屬多故積歲罹荒凶憂傷軫當宁遣使祀靈宮祝辭
致虔懇香帛寓寅恭嗟予本微陋旬宣忝陪從願言沛
甘澤一以蕪疲瘵惟神荅靈貺庶幾昭感通

歸田 明鄭觀

嵩少歸來卧卜山浩歌聊適白雲間門當流水聲常在
鶴舞秋風意自閒清興與舉杯邀月醉倦遊呼伴引筇還
蕪田賴有阿舒輩世事寥寥總不關

送客遊長春觀 明賈璇

長春觀裏最幽清送客西歸適我情獨賞孤松含晚翠
不看衆木占先榮四圍山色濃還淡一派河流縱復橫

若說仙家都是幻何如拍手鶴來鳴

段干木祠

明王翰

殺妻吳起非良將食子樂羊真鄙人爭若先生無一事
西河能解虎狼秦

汾州閱武

明魏允貞

親提虎旅控西河聞道匈奴遮塞過門外秋聲生鐵甲
臺前霜色上雕戈材官一夜精神倍野戍三秦殺氣多
安得普天烽火熄盡將鏡吹變笙歌

卜山書院

明慶成王慎鍾

洙泗傳經業河汾退老居山深惟石室泉隱自林墟樹
鳥鳴先哲階蟲篆古書聖門重高尚千載仰芳譽

過金鎖關

明朱鳳岩

世事已如此勞勞愧此生十年塵土夢萬里故鄉情曲
路稀人跡高天有鴈聲羞看白髮變忽爾壯心驚

文湖漁唱

明鄭儀

萬頃銀濤裏扁舟雜往還煙消然竹籜日上整綸竿睡
足蘆花月歌殘雲水灣得魚橫野渡心與白鷗閒

謝郡侯張公禱雨輒應

明孔天胤

使君閔雨愜靈心一請垂天三日霖笙鼓水龍喧社處
兒童竹馬躍城陰青山閣眺晴光滿翠野帷褰秀色深

歲有何人不稱慶老農先奉萬年吟

送李西渠通府署汾畢事還路

明孔天胤

五龍高郡出浮雲一鶴清風借與汾
月在水壺同亮采
雨隨芝蓋下晴曛舊疆還守車仍邁
新館留行袂竟分
東望迢迢盡烟樹可勝嵐嶺復氤氳

贈程一山叅戎始建牙汾郡

明孔天胤

北闕授符推轂後西河分閫建牙初
宏修軍禮昭文幕
遠闡兵威到朔廬戍靜關山和月唱
氓安隴晦帶經鋤
方知上將收全勝頓令邊庭絕羽書

贈張龍岫太守入覲榮旋

明孔天胤

春日朝廻守舊疆萬家烟景襲餘光
桃紅細雨隨車下
蘭葉香風引綬長再見王君馳蜀道
重逢寇老借河陽
依然美稷兒童輩竹馬紛紛逐路旁

仙槐觀訪王全真道士

明孔天胤

捨榆猶不至容與道林翔庭儼更生
樹人修不死方詩
瓢逢隱逸茗椀酌清香無限青霞意
偏令此地長

贈杭太守抗疏還山

明孔天胤

使君明經致高位五馬雙旌列侯貴
到官首夏同清和
忽感秋風遠思退乞陳亶亶遂連章
印綬纍纍不可繫
當塗留勉惠元元使君必欲果歸言
吏民擁門復遮道

使君不肯停征軒只耽江上尊鱸美詎戀橫汾簫鼓喧
橫汾簫鼓聲嗚咽寒雲一片傷心絕塞北江南此地分
水遠山長夢難閱搖搖玉鴈曉離披冉冉金烏文明滅
昔時名重孝廉船殊勝青雲著早鞭今日扁舟羨張翰
孤棹何慚李郭仙紅蓼灘頭罷吹笛曠放太湖清渺然
看君骨相冰壺裏朱絲之繩直堪比卜居偏鄰善卷洞
辭榮獨慕延陵子五岳尋真非浪遊定得無生亦有死
神鼎丹砂爛九霞王陽黃芽滋萬藥將追二老芥六合
何怪棄官如敝屣

伏暑登郡城北樓

明孔天胤

逃炎攜酒得同遊共上高城一倚樓窻閃樹光涵遠岸
蒼飛旗影像虛舟科頭白日冠皆掛揮手紅塵劍獨留
向夕須收阮公嘯露華瓊宇不勝秋

暮春過子夏祠

明孔天胤

舊蹟陶山表荒祠相里存土花閑雨繡石樹斷雲屯聖
遠傳經術時危輟道論寥寥竟千載誰與奠芳蓀

卜亭行

憶昔先師道不行七十二賢皆守經大者散爲侯國師
小者宰邑餘飄萍當時魏文頗重道其師卜商抱道西
河老玉韞自然山有暉至今山以下爲寶此山翠嶺橫

地維綿亘百里深委蛇中有石室似天造要令文儒隱
在茲文儒化去二千載空山只有白雲在隱隱書帷挂
薜蘿茫茫古道來樵採王官張子振遺躅結草爲亭傍
山曲命名取義象先賢思義顧名美可續學禮攻詩早
貫穿摘篇灑翰復殫研奮飛有時適不遇退藏猶得保
林泉林泉一片好閑地高卧不減羲皇世聖門師弟且
遑遑咄嗟我輩成何濟綠壑丹巖無垢氛碧樹珠泉風
雨聞醉來大嘯叫猿鶴靜後一心窺典墳温飽亦不缺
朝霞可餐蘭可結鐘鼎萬戶食銀黃三組榮回首可憐
要領絕我觀張子毛骨奇頭圓耳闊神仙姿不礙曳裾
爲吏隱大隱小隱誰能知留侯辟穀從赤松果老下山
騎雪龍二翁風流遐哉邈矣隔霄漢子爲苗裔可能天
矯躡華宗

送卞知事署汾事竣還省

明孔天胤

會逢嘉客本無期顧步柴門却有時求友高深黃鳥解
惠民幽隱白雲知春風正擬頻揮塵芳草那堪更唱驪
臨水送歸君不見隔烟楊柳亂成絲

和一川太守仲秋雨中行祀馬跑泉祠

明孔天胤

聞道隨車雨相將出谷雲
襄帷觀野俗露冕見仁君
樹引雙旌濕香迎夾路
焚川原方望幸時享復精勤

遊長春觀登鶴鳴古洞聽鶴鳴

明孔天胤

仙人騎鶴去洞口白雲封何時遺清唳猶聞在古松山
藏燒藥灶門掩上堂鐘羽化嗟如此空林一駐筇

三月十一日宴北野山莊題于小洞

明孔天胤

何處岩居好林邊小洞幽荆扉長晝閉柳堰伴春遊坐
石依山足分溪到水頭飛紅寒食盡積翠暖烟稠友意
存黃鳥閑心共白鷗浮杯要淹客怕帶夕陽流

題高貞婦陳氏册

明孔天胤

東方有賢淑少小稱未亡內牽慈母恩上以奉姑嫜茹
荼三十載掩鏡滅鉛粧一心抱貞孝皎潔團冰霜朔風
起當晝白日含精光孤鶴叫元夜落木響空堂是時悲
且勵單情誰爲詳昊天毓靈秀賦之綱與常丈夫翻改
步奸諛代成行視此純白姿豈不惡蒼黃衆草委秋色
幽蘭揚其香我貴在從一柏舟胡感傷德立而不朽垂
聲以無疆

吳孝子

明孔天胤

思親遠似望雲時日日看雲不盡思萬古蒼冥空抱恨
百年風木有餘悲夢臨霜草秋天老腸斷墳廬白晝遲
我亦思親親更永感君和淚一題詩

三月三日宴集王龍岡洪西別墅

明孔天胤

小築依岡半長林帶浦斜翠浮魚戲藻紅亂鳥銜花會
以羣賢盛辰因上巳嘉引流還列坐併此醉烟霞

卜山書院

明慶成王朱知煉

卜山擁翠勢崢嶸世遠空堂草自橫湖底寒流嗚咽裏
令人疑是讀書聲

謁狄武襄公祠

明范珠

宋祚方興虜未平將軍百戰捍危城流言難泯生前節
信史猶傳身後名八尺宵碑蒼蘚合一區故宅野雲橫
晚來風撼溪山樹彷彿南征萬馬聲

過黃櫨嶺

明楊璿

冉冉夕陽西行行信馬蹄亂雲山遠近碎石路高低黃
鼠作人立元猿迎客啼自緣羈思切觸景轉淒淒

校士喜雨

明趙喬年

同雲瀰漫雨垂垂正是三農閔望時太守何能尸帝力
皇穹原自軫民危煙籠棘院龍蛇舞霧擁文林桃李滋
自此西河多樂事微臣擬獻太平詩

晚渡汾河

明范晟

長流滾滾鴨頭新路隔東西據要津紅蓼綴灘霞散錦
白蘋觸岸浪翻銀夕陽林杪催行急水鳥沙頭喚渡頻
閑聽棹歌聲欸乃滄浪一曲濯塵纓

九日汾上登高

明周鼎

草樹蒼茫烟霧收不堪多病強登樓長天雁寫雲中字
大壑龍吟笛裏秋萬里西風吹短鬢一年佳節事清遊
相歡未可言歸去乘月還須泛釣舟

汾州秋興八首

明曹徵庸

年華如逝水空流木槿花繁絡緯愁客裏若爲憐皓月
天涯乍可占清秋山城高樹涼風過孤館疎簾暮雨收
不惜烏烏消鬱寂却看燕燕已歸休

涼宵橫笛好招尋耐是塵勞苦見侵欲共孤雲藏谷口
時翻流水入琴心驚人夜月清砧候回首春風白髮深
聞道仙家長日月莫須清淺一浮沉

攜來長物是茶鐺落木疎鐘對短檠叢桂清陰時在想
敗荷涼露亦關情平原肝膽千年是神武衣裝一日更
待訴相思無半字床頭蟋蟀太分明

見說中條好遁藏秋風還憶綠尊鄉烟迷竹樹連天合
花蔭房櫺特地香睡寐未祛宵正永逢迎已盡晝偏長
心知一懶眞成癖更不逢人乞療方

愁來白苧一停歌老去青霜兩鬢過黕黕夕陽高鳥沒
蕭蕭秋柳暮蟬多冠軍出塞嗟何及前箸籌邊定若何
昨夜城南橫索馬傳呼客騎度關河

汾陽縣志 卷十四 藝文
九日汾上登高 明周照

草樹蒼茫烟霧收不堪多病強登樓長天雁寫雲中字
大壑龍吟笛裏秋萬里西風吹短髮一年佳節事清遊
相歡未可言歸去乘月還須泛釣舟

汾州秋興八首

明曹徵庸

年華如逝水空流木槿花繁絡緯愁客裏若爲憐皓月
天涯乍可占清秋山城高樹涼風過孤館疎簾暮雨收
不惜烏烏消鬱寂却看燕燕已歸休

涼宵橫笛好招尋耐是塵勞苦見侵欲共孤雲藏谷口
時翻流水入琴心驚人夜月清砧候回首春風白髮深
聞道仙家長日月莫須清淺一浮沉

攜來長物是茶鐺落木疎鐘對短檠叢桂清陰時在想
敗荷涼露亦關情平原肝膽千年是神武衣裝一日更
待訴相思無半字床頭蟋蟀太分明
見說中條好遁藏秋風還憶綠尊鄉烟迷竹樹連天合
花蔭房櫺特地香睡寐未祛宵正永逢迎已盡晝偏長
心知一懶眞成癖更不逢人乞療方

愁來白苧一停歌老去青霜兩鬢過黥黥夕陽高鳥沒
蕭蕭秋柳暮蟬多冠軍出塞嗟何及前箸籌邊定若何
昨夜城南橫索馬傳呼客騎度關河

江南塞北信音稀苦憶烟蘿繞竹扉照水雲霞新雁字
垂陽翡翠舊漁磯夜涼急雨驚歸夢蚤起殘星滿客衣
白鷺滄洲吾志在却緣何事寸心違

一篙秋水五湖雲慣入高鴻野鶴羣忽那風塵辭宛洛
更逢搖落滯河汾夷門想像驅秦策泚水經過破趙軍
誰謂書生無使骨龍泉遶壁異香薰

釣簾我自劇愁思疎雨涼風故故吹閒看白雲飛去後
坐聽黃葉下來時俸錢西割哀鴻食饋餉東憂倚馬炊
共笑買生流涕早獨疑梅福挂冠遲

題法興寺

明朱表楡

載酒東林上巳前春風消息杏花邊日長塔院逢僧奕
草暖堦除見鹿眠流水漸融巖洞雪清霧未散石堂煙
平生也解求心性一到禪關一了然

亂後過天寧寺

明朱奇湏

禾黍離離烟滿川寥寥孤鴈夕陽邊將軍馬繫禪林下
借得僧牀一覺眠

東谷菴

明朱奇湏

拍手鄰山喚得應秋山門戶冷如冰烹茶不用村家火
洞裏龕中有佛燈

鶴鳴古洞

明崔士榮

山人騎鶴入遙空，祇聽餘音振谷中。
遺跡千年成勝景，浮生半世類飄蓬。
黃花招客樽盈綠，碧洞棲雲木落紅。
忽憶家山深隱處，巢由高轍許誰同。

巡西河見兩學諸生郊迎，輶軒有句書以示之。

明文翔鳳

子佩青於千樹柳，帳紗紅是半天霞。
桃花水裂文湖錦，蘋末風還后土家。
電影欲飛登座舌，帝鄉新到借書車。
吾將促發陽春箭，坐督烟香入露華。

閱士西河值久旱喜霖雨沾渥，漫賦一律步壁間文。

太青先生韻

明吳時亮

教衍河汾聖澤賒，人文蔚起赤城霞。
薰風徧洽凌霄士，甘澍旋敷望歲家。
應識詞源能倒峽，敢云化雨卽隨車。
滄溟波湧神魚躍，會看文湖翻浪華。

長春觀

明鄭柏齡

烟霄開紫閣，雲日亂青林。
怪石臨流淺，幽花入院深。
紫烟盤水曲，迢遞俯岩陰。
爲愛山源好，春來幾度尋。

西園共賦羊耳山莊圖詩

明鄭柏齡

誰繪幽栖處，烟霞傍酒尊。
釣臺疑渭水，瓜地卽青門。
月轉明如晝，城高靜似村。
詩成人已醉，忘却在西園。

住持天寧寺

明釋妙總

語言全不滯，高涉祖師蹤。
夜坐連雲石，春栽帶雪松。
鏡

明金殿冷山苔月樓鐘有問西來意虛聲對遠峰

督家僮築場 明朱慎錫

露墜聞秋氣原田已漸黃夕陽西嶺下暝色遠邨涼爾輩宜乘月將鋤好築場蟲吟聲在草切莫誤相傷

與胡處士庭訪北齊碑 國朝顧炎武

春霾亂青山卉木苞未吐繞郭號荒雞中田散野鼠策杖向郊坰幽人在巖戶未達隱者心聊進蒼生語一自永嘉來神州久無主十姓迭興亡高光竟何許棲棲世事迫草草朋儕聚相與讀殘碑含愁弔今古

子德自燕中西歸省我于汾州天寧寺 顧炎武

一載燕臺別頻承注問書天空烏鳥去秋到鴈行初共識斑衣重偏憐阜帽疎輕身騎款段一徑訪樵漁

顧炎武

冬至寓汾州之陽城里中尉敏浮家祭畢而飲有作
歲時常祭祀朝夕自饗殮尙是先人胙誰非故國恩枯哇殘宿雪凍樹出初曦奠醊求何所鄰家借小園
流離踰二紀愴怳歷三都墮甕煤還拾承槽酒旋沽荒庭依老檜空谷遺生芻白髮偕宗叟相看道不孤
王孫猶自給一頃豆其田今日還相飯千秋共爾憐青門餘地窄白社舊交偏傳與兒曹記無忘漢臘年

臺駘廟

朱彝尊

鳳鳥書官後鴻荒障澤年神功開白壤帝系出金天分
野捫參次山川奠禹先按圖移岸谷紀遠昧星躔亂水
汾洮別諸姬沈似聯唐風誰始祀魯史至今傳簫鼓橫
流散風沙急溜穿勢會吞北漢潤亦被西邊壁馬黃河
竝雲旗玉井旋軒裳存想像憑弔一茫然

嘲松

胡庭

汾俗正月斬松枝植門前或編花朵其上夜炷香

苞中

誰向石橋畔移來金谷闌陰濃連上苑跨據近通津散
子叨佳饌分枝占艷春遨遊游冶客鑒賞老山人解與
歸僧接會爲社鼠鄰卑睇梅竹友貴挾虎狼秦巢頂鴟
梟滿乘涼犬彘頻晦冥藏魍魎交互長荆榛夜黑啼風
雨秋空詫鬼神籠雲深蔽日攀葛遠聯姻窸窣號天籟
時時墮暗塵高低香饋送南北鳥逢迎直作千年計長
存百尺身會無滄海固太認棟梁真粉蠹俄爭蝕條枚
不重新焦枯拳蜎縮垢膩宿龍困望影堪加聖批根欲
錯薪甘棠猶剪伐切莫怨洪鈞

向陽道中

胡庭

曲折向陽道遙瞻路渺茫形從驢背子泉逐佩聲長鳥

汾陽縣志 卷十四 藝文
道繁花覆人烟古樹蒼蒼然回首處落日半山黃

悼子堅二首 傅山

王子狂而疎行真不掩言於其所真時蹉蹉亦未然詩
篇多新警殊不憂憂詮短小過達衢龐大奴才駢醉眼
也西河黃茆連青天

一命可不愛如獨遺厥母太真猛渡河終天恨終古豈
無膝下兒病寒而汗迂際遇各有時性情殊樂苦

傅青主至汾詩以贈之 無名氏

雲客不慣城市步要入千峰萬峰住嘯聲散作滿林風
鶴語時墮青天路乘輿偶來汾上側絜壺懷刺人爭識

一見開襟勝所聞樽前頓長青松色星冠鶴氅何歲始
云經亂離才爾爾書著一部晉春秋詩紀三年新甲子
滿腔肝膽不盡吐霜夕哦成月卓午兒問題詩贈阿誰
太原高士傅青主

甲申賊入汾城王爾掄先生舍身救衆汾人德之收

淚命篇 無名氏

二月二日賊西來妖風刮地起黃埃衢路縱橫填甲馬
王孫帝胄虜成灰家家骨肉不相保衣冠半羅桁楊災
呼天搶地正怕死忽遇三原王夫子解縛周旋禮數隆
期期不奉賊驅使冀南一路罷誅求逆弁頻催但掉頭

不見太原兩處虎一日屠宗一千五我公預泄毒機關
汾宗一一逃深山僞主大怒將公逮入屬生靈齊下淚
嚴刑幾斃華州城三木三時對獄吏公前應是金粟身
再來救衆傷不嗔愧哉吾儕報未伸白龜黃雀將笑人
弔汾令劉必達 無名氏

吁嗟噫嘻劉公豪吾不知其誰爲擬浩氣橫飛拍天起
一生聲價振關西半世功名付汾水憶賊破晉雷電馳
求死不得首低垂銀鑄直係太原道蠟書猶報長安知
事泄怒公公不悔我自盡忠任爾爲柳街草染萋宏血
槐市人攀玉蠋枝君不見鰲足斫折傾天闕日月下墮
蛟龍窟長夜漫漫燐火紅山精水怪爭出沒小儒膽裂
心且焚往來奔命迷妖氛虎目誤傳雙聖火燐氣咸成
五色雲豈知玉界真人下重懸烏兔光中夏忠魂義魄
盡宣揚無骨之蟲罪安赦吁嗟噫嘻公眞豪英風激射
鼓洪濤地下周旋輔故主千秋憑弔傾吾曹峴碑屹屹
棠枝高

大水嘆 無名氏

數逢陽九晉汾川東望洋洋百里連夏杪靈蛇頻踴躍
秋深石燕尙聯翩懸流噴砌家成沼駭浪盈科井出蛸
梅別送迎猶可度漏通大小寶難延郊垞何自分原隰

疆野無從辨，
麥場漂汎無存粒，
禾穗衝批乏剩，
稍廬舍盡爲蚊蟒窟，
農吐半作鼈魚顏，
漁人舊捕多迷渡，
飛鳥前洲也失還，
女哭兒啼空有淚，
夫耕婦饑竟無田，
鵝鳧族聚難名指，
鷺鶴朋遊羣翩翹，
菰白蓼紅難過剪，
蒲肥芷瘦誰趨蹇，
歷陽湖化猶堪弔，
汾壤渠成倍可憐，
河伯不仁開澤國，
陽侯肆虐起樓船，
泛宅移家化離嘆，
繪圖入告懷前賢，
弔中部令朱新越。

無名氏

秦川白日起烽烟，
國破孤臣命合捐，
淚洒青衫猶帶赤，
膽歸幽府至今懸，
一時勵節三邊動，
八口啣悲九廟遷，
自是忠魂何處覓，
淒風涼月聽啼鵑。

弔賈客

無名氏

身投魔罟晝爲冥，
奮搏無端飽孟青，
詐入忽提三尺水，
怒號橫剖一腔腥，
干霄勁節金難鑄，
振古英風石可銘，
莫道編民無意氣，
東城精爽至今靈。

鶴鳴古洞

無名氏

洞中仙子住何年，
跨鶴飛飛不復還，
素影已隨雲影去，
唳聲猶借谷聲傳，
緱山遙待通消息，
瀚海新歸報變遷，
憑弔幾人能羽化，
高吟喚起萬峯煙。

雨漬仙碑

無名氏

頭石猶知點法臺西河瑞碣不須猜潮蒸磅礴偏難雨
氣汗龜趺已發雷幾度摩挲瞻碧落多年封剝問蒼蒼
追尋靈跡都無據疑是天妃海上來

彪嶺樵歌 無名氏

家住青山山性宜腰鎌朝出任渠之行携物外無心倡
響落雲中得意時似和牧童牛背笛恍吟仙子石頭棋
逍遙只在千峯裏今古宣傳知是誰

校士西河時方憂旱忽降甘霖喜賦二律和文太青

先生石刻原韻 李觀光

半載馳驅道里賒甫來石室想煙霞時當蒲木紛千晦
雨足田疇樂萬家自信此心爭似水漫言甘澍好隨車
論文且喜消炎熱擬向郊原覽物華

芹藻方思樂泮宮更看化雨吐長虹懸知潤物資蒼昊
何事尋仙問紺瞳載酒鶯啼聞曉曉插秧人滿滴空濛
逢年况有蠲租詔鼓腹羣黎頌 聖功

汾河懷古 劉允升

頽波蕩蕩草芊芊巡幸曾聞元鼎年哀樂情多非少壯
帝王願極又神仙中流簫鼓樓船震夾岸旌旗日月懸
留得秋風詞一首斷碑苔蝕卧蒼煙

贈隆庵山人 鄭琦

遠公棲碧社蒲座雨花翻松老禪心寂晏清覺性圓傳
經翻貝葉洗鉢著青蓮遙對彪山月談空忘夜眠

龍橋廢寺玉泉不息

鄭子玉

策杖龍橋寺山空不見僧路迷經石亂鐘斷白雲層鳥
篆留殘碣螢光代佛燈慈源常普潤冽冽玉泉澄

壬辰七月三日趙孝廉滋大避暑別業招飲卽席和

西河郡守姚公韻

翁志洵

懶向金門鳴玉珂郊原別業靄烟蘿松筠僻境忘炎暑
山水清音勝雅歌已建詩壇分險韻更開射圃築平坡
茂林修竹羣賢集風景依稀似永和

署中雪

孫奏

公庭稀吏跡宦况益蕭然素性真如我冰心似問天送
迎閑此日詩酒樂何年遙想歸來好燈花落鏡前

吳子孟昱之任粵西過西河署偶贈

孫奏

知君行更疾猶爲故人留短燭三更話長途萬里愁榮
枯常異地聚散老同遊不記何年別相看並白頭

弔八將軍

顧凌霄

將軍玉牒出天潢不許貲財齎盜糧舌在豈能摧魯國
膝強誰敢屈睢陽早知國破家何惜轉恨宗殘命合亡
折頸裂冠悲獨慘幽魂自可報高皇

汾陽縣志
卷之十
藝文
三

儒林義勇寔堪推守策津津數出奇壯志未酬身土壤
忠魂有淚哭城陴雖無鴻績垂青史自可蜚聲勒口碑
宿草一坏長寂寞令人空憶舊容儀

弔八將軍

劉文德

敢笑金符肘後懸天家義武勝戎旃虎鬚盜跖驕鳴吻
龍種王孫泣杜鵑絲粟空筇膝有鐵風雷交日刃無權
長爲秦楚舒悲憤貫日虹飛憤始宣

弔楊生

劉文德

浩然士氣凜難移耻作圜人逐亂離慷慨特歸竇序死
衣冠還付井泉知忠魂兩夜重闌夢信史千秋一乞兒
得已從容猶不免鯁生亮節最關時

汾陽官署秋夜

周于韓

羈旅西河日高秋晚眺時涼風入幕早孤月到窻遲籟
靜琴餘韻機忘鶴欲隨東山何處是南雁去參差

讀黃太僕公傳

沈鴻瑣

寇逼汾陽奈若何援師底事尙蹉跎堅持大節威難奪
困守孤城死足多血舌存時猶罵賊忠魂厲處復橫戈
餘氛轉瞬隨烟滅留得公名遠不磨

汾陽署申正月二日大雪作禁體物字

邢秉誠

殘臘策馬雪乍消河汾春轉冰漸漂元旦薄暮吳二作
官衙曉霰輕鴻毛日昃漸猛粗似餅紙窻亂撲雄于敲
斜點四壁聲淅淅橫舞半空態飄飄有竇卽穿入瓦縫
無風亦旋堆塘均遇圓卽規方卽矩臨深迷阱淺迷濠
捲簾驚眩渾無地行路駭突方知橋憑高但覺乾坤縞
眺遠不辨草木凋着松老衲禿短髮壓竹君子折長腰
矮屋參差萬壘平古堞周環百雉高且莫登山展埋齒
便欲尋梅驢沒尻憶昨無霰致早暝快今有雪鋪麥苗
捏作狡獪羣兒戲滅却蝗螟老農謠休共袁安圖僵卧
且賦梁園誇雄豪掃來烹茗煎蟹眼載出佳釀羅羊膏
主人愛客旣款曲況喜瑞葉紛乘颺命題白戰禁寸鐵
毛穎馳驟軍聲塵爛醉不知陽烏出踏雪北頂捫雲霄

金鎖關

邢秉誠

地險雄金鎖天工勝玉關兩崖巖勢敵一逕騎行艱荆
棘攢千疊嗟哦抱萬山昇平嚴戒少障塞亦常閒

孫孝子詩

錢陳羣

汾州屬縣有汾陽嗟哉孝子孫懋昌六歲失恃何郎當
父滯天津如秋蓬旋死於客遺路旁誰其瘞之鄉人張
懋昌稍長痛父亡日夜啼哭走且僵走尋父骸跂而望
枯骨遍地春草長仰不見天如瞽盲又歸叩其鄉人張

汾陽縣志 卷十四
云有津民古萬蒼爾往詢之庶得詳千里徒步跣踏霜
一步一跌一積頽萬蒼曰何容易談城西官地古北邙
汝父昔瘞破廟東瘞時淺土覆滿筐今也水流何浪浪
瘞時近棺容車箱今也累累如瓜瓢我今行年六十強
但見新墳狐兔房不見舊骨還其鄉懋昌一哭欲斷腸
始識其處不易方時當 王政舉瘞藏官於此者肅公
令近前數棺小者殤最後一棺骸骨完齧臂取血血交
橫以血沁骨入不傍曰今見父吾得生朝辭津水歸太
行嗚呼皇天感其誠鬼神布護晝晦作詩紀事化下
氓書之錦幅表其名

金鎖關

周起

一雙峭壁插天起
崢嶸勁敵相對峙
朶朶巉石色穿雲
勢欲壓覆行人悸
萬株矮樹棘成叢
互嵌迸裂根玲瓏
犬牙鹿角爭萬狀
罅漏一綫窺青空
吾送 王師亦策
蹇過此馬首勒莫轉
層岡疊嶂抱咽喉
百轍千途總不舛
三晉雄圖左太行
黃樞右度通秦疆
迴環崩削不勝數
飛泉屈曲奔向陽
南接狐岐北彪嶺
汾右兩分內外屏
世平則玩久則弛
自昔設防最嚴整
漢晉歷代巡邏制
專屯要害許奸宄
控弦帶甲六十名
斥堠延袤三十里
嗟今山勢空崔巍
王公設險安在哉
原非五丁巨斧

劈障塞無煩管鑰開王道本貴蕩平路唐虞豈恃山谿
阻謀國苟非兵食足總有天險亦不固君不見秦地崇
關一百二沛公先入誰能禦又不見萬仞劍閣蜀門戶
奉璽降王問何故但聞嘉隆兵氛來偏頭直抵汾城隈
假能阻隘預守備何至四野烽烟摧吁嗟乎薄祿總膺
民社職保障申嚴豈無識夕照停鞭空嘆息

文湖懷古

周超

辛丑歲春夏奇旱發帑開倉賑濟及秋霖雨東鄉
村莊被淹蒿目時艱慨然有作

秋霖淹沒郊之東磬罄中澤鳴哀鴻蹇騎村行十里許
百頃一碧騰空濛咄哉汾本高涼地此何跨下偏傷農
乃憶邑乘知所自文湖巨浸原含洪隱泉文谷咸會納
隋地傍作汾陽宮當年避暑築臺榭憑虛水閣凌蒼穹
四望翠螺旣環拱瀦城睥睨斜陽紅漁舟款乃棹歌發
傾耳蕩滌人心胸近湖村落資灌溉明守禁鑿汾波通
愚民但窺一時利私決無復當時耕桑田喜從滄海變
詎知旱潦年難豐反資丈勘報實數澤潞遼沁藉以充
醫瘡剜肉幾時已蒿目何怪黎民窮非直膏腴失水利
低窪十室亦九空計畫莫若棄地半疏瀹蓄洩得其中
仍會故流使不竭秋禾春麥收全功豈獨勝景恣游賞

婦子熙皞歌華封止易觀成難慮始徘徊藪澤追遺蹤
馬頭捲浪悲秋風

禹導河

周起

巨邑橫安流千古明德頌發源西北隅噴岵紛錯綜靈
豚彪之麓濺珠吐罅縫咄哉崇伯子相度下流雍石卵
汨泥沙橋楫殊厥用淤滯迅駛驅不待驂駟縱至今千
萬年瀾漫得所統西南禹門流隱泉北來共匯此竟達
汾大國朝鄭宋引灌數十頃婦子獲殮養奚必泛蘭橈
鳧鷖魚作俸米碓邊上流園林各自封三分引入城舊
例豈聚訟水利古今同鄉國合並重余曾一溯澗沿溪
減騶從形勢臚心胸分波貴決壅二八兩月間更不礙
耕種廬市煙火稠均得汲以供敢憚挹注勞誰肯採菲
葑前人不我欺朝夕豐碑誦將毋築舍謀觀瀾徒惶恐

禁火臺

周起

汾陽地與介山連築得層臺祀昔賢綠柳至今傳禁火
白鴉何事早思烟晉文焚林求推有白鴉繞烟而自憐
噪火不能焚晉人爲築思烟臺
食熟三千里又見花開五百天弔古恐多愁緒觸憑高
不忍問絲田

賀魯將軍祠禱雨

周起

去秋及今夏亢暘燔草木夏時心如焚遍向諸神告人

言賀魯祠乃在彪山麓歷代英爽昭竭誠凜齋宿戒從
走嶮嘔泉聲響幽谷此泉馬所跑勢若龍蛇曲山中異
村莊萬樹森以綠神祠立泉源峰巒匝南北廟貌果巍
峩班象整且肅侯自元魏來封典著簡牘潤濟豐碑傳
恩波一方沐酒醴肆筵設疋巫矢恭祝泥首頓階墀願
救此邦族禾黍雖若枯尚可望收穫是時若不雨白骨
自難肉山川速出雲甘霖必需足槁苗勃然興流離免
馳逐婦子復聚首老羸得鼓腹便當秋賽早牲牢報神
穀神苟不我聽莫挽天心酷非徒邑宰嗟恐亦非神福
虔禱畢致詞靈籙已四簇徹奠始歸途衣裳沾霖霖未
幾大沛然異哉神靈速

黃太僕祠

周超

太僕新祠列肆旁當年戮力守汾疆虎狼勢劇侔安史
雀鼠羣空泣許張稚子覓尸無馬革英君錫典有龍
章卜山文水蒸嘗永瞻仰巍峩一瓣香

弔馮生

周超

流寇環城殺氣遒書生畫策保汾州但聞甲士登陣哭
誰聽將軍聚米謀無社惜從茅經引陳東恥向寶刀休
至今俠烈難埋沒荒塚雲封夜夜愁

弔楊生

周超

辱身牧馬命難承始識儒冠不可凌
滅頂甘歸文廟井
捫心何減玉壺冰
九泉獨赴形誰述
兩夜空闈夢有憑
料得英魂依泗水
結纓先哲合添朋

弔賈客

周超

亂離莫賤販夫名
拔刃捐軀志獨貞
大吼轟天人盡廢
九迴委地賊猶驚
身羞蜚影三招辱
命等鴻毛一擲輕
應笑計然推善算
遙垂七策止謀生

弔朱令

周超

關中鼙鼓勢縱橫
殘破荒城邑宰驚
勁卒三邊猶失守
孤臣八口盡捐生
冰清泉路形先現
瓦解山河力尙爭
隆準無慚漢祖裔
魂歸故里恨難平

弔武妃

周超

黃巾白馬勢縱橫
妃主捐軀井共清
絕勝湘君揮淚死
羞從羊后映顏生
重泉有志尋龍種
荒塚無人奠兕觥
薄宦忝持風教職
奚容康定不蒙旌

安康安定兩夫人俱死宋難

弔劉氏

周超

枕尸慟哭恨無天
簇擁難摧烈性堅
豈忍纖腰馱馬背
自甘延頸飲龍泉
綠林敢使朱顏汗
芳草猶教碧血澣
寄語史臣彤管載
清風嶺上舊痕傳

汾州有懷段干木

黃立世

魏國有高士高卧過秦師文侯走相見踰垣惟恐遲清
節不可屈浮雲不可移一見大難事乃欲奔走之朝上
山之巔暮臨水之湄羅者尙藪澤冥冥鴻已飛

汾水行宮詞

黃立世

月榭風軒傍水開年年歌舞果如雷君王花下頻中酒
莫遣蒸雲送黑來

複道離宮接舊京青波碧柳畫船輕何人教作揚州夢

廿四橋邊看月明

辛卯秋初閱稼志喜

李文起

拙吏憂民食夙夜心忉忉汾患多旱乾灌溉費桔槔今
歲甘霖降六月更如膏老農知乘時耕耘各自勞黍稷
新吐穗嘉禾亦已高疆場雜瓜瓞所在無蓬蒿依依我
士女庶可免嗷嗷凡民有恒性寧敢外甄陶所恐生理
絕妻兒相啼號忍心喪其天桁楊安所逃念茲三太息
豐稔慶厥遭

卜山

李文起

西衍尼山脉巖巖仰卜山統開文學祖科並閔顏班三
晉傳模範西河有杏壇蒼松盤石室萬仞欲躋攀

黃崖道上口號

李文起

白彪朝陡雪霏霏層上黃崖接翠微風急馬寒嘶鳥道

夕陽影亂野雞飛

卜山書院觀元孫鳳儀先生詩碑

田周

地老天荒失此人
斷碑拂拭恨還新
已無大力扶孱主
剩有危詞哭老親
慷慨八哀真激楚
飄零一劍不歸秦
數椽書舍蒼雲外
翹首西山感嘆頻

偕陳柘湖詣天寧寺訪明顧亭林先生遺蹟

田周

古木寒烟佛寺東
當年誰識鹿皮翁
魚能讀月紅牆隔
鳥會談天碧殿空
初地最宜偕舊雨
老槐猶及見高風
我來堦畔頻搔首
欲把滄桑問大雄

題峪中匯清園

呂誼

山水兩相宜
亭軒景物奇
烟濃松影合
林密月痕篩
危石侵花徑
幽泉趁竹籬
緬懷誰氏業
莫是朝川遺

過鶴鳴古洞

呂文櫻

跨鶴仙人去遺踪
寄碧岑得音方
信近探洞不知深
丹頂雲隨杳黃冠
壑共沉空流餘響
在千載費追尋

弔雷烈婦齊氏

呂文樞

天地有正氣
秉作匹婦烈
豈爲身後名
濺賊有碧血
亂擊罵益厲
心若九鑄鐵
甘死鉅石下
清白不可磯
詔旌大節存
一坏猶凜冽

讀黃太僕公殉難篇

呂肯堂

我聞星嶽鍾間氣生人秉之得英銳殺身成仁白古難
忠肝義胆照天地君不見張文昌守睢陽血戰四百誰
能當又不見顏魯國罵賊舌凌凌氣奪李希烈我今披
讀黃公傳凜凜如見顏張面公馳五馬遼海來汾州方
賴仁風扇大同姜瓖本新降心屢反側舉兵變賊黨突
至圍汾城黃公氣憤經百戰內無宿飽兵外無螻蟻援
羣醜勢方張驀駭東門陷張拳巷戰晝昏霾孤臣力竭
身遭絆痛罵殉城義素裕血灑英風死不仆卹贈太僕
饒榮施 勅立特祠金碧聖四篇家訓世德昭文孫開
府牂牁駐天報丹忠不爽真爭光日月廟貌新顏張鼎
足垂千春

謁狄武襄祠

田震

崑崙關前雲糝糊孫沔余靖何爲乎一朝賊盡燒厥郭
耕者自耕鋤者鋤廓清嶺徼歸皇都此功是誰之功歟
我來訪古城北隅武襄廟裏焚生芻仰瞻堂堂七尺軀
英姿颯爽雄鬚鬚陰廊畫壁剝蝕餘猶似當年親援枹
千重鎧甲萬僕鐔逕逼賊砦賊不虞歸仁舖外羣叫呼
爭羨威名絕代無或言神勇天賦殊前生本是黔彭徒
或言折節能讀書每以經術爲兵符紛紛臆說空揣摹
是時但不聞廟謨

文湖漁唱

賈健

文谷經汾匯似湖漁歌傳咏蹟模糊流波千頃舟明滅
欸乃一聲人有無滄海昔曾變黍稷桑田今又走魚鳧
清音水面留風韻想像蘆花蕩裏呼

代西河長命女歌

周天益

儂本漢歌女採風入樂府誰料千秋後巍然食茲土特
因長命字謂儂本仙侶恐斯言不信寔之以漢武更嗤
好事者片碣藏陋語一旦撮以出闕然驚聾瞽且聞聖
仙號錫自何帝主史册所不書徽典憑竊取倘遇釐正
人儂將何地處聰明正直一念此汗如雨而乃大標榜

求儂過阿姆莊嚴其廟貌輝煌其牖戶尊儂以正位俠

儂以四輔昭濟自有屬紛若競樽俎

邑志不知昭濟所出此晉祠水妃封

號也偃僮猗那迎優令婆婆舞周市與曲街喧闐儼如堵

晨則薦牲幣夕猶考鐘鼓姬豎樂趨蹌驕慳偏羅儂熱

腸急供事冷眼自閒顧漸趨漸紛拏警以回祿怒不肯

測天心轉爲廓基宇臧辰縱逆祀宣聖嚴鉞斧哀哉俗

情愚儂亦何屑數但念生育事此理自明楚厥初自天

地是爲大父母或其積累深發祥自乃祖栽者必繁昌

傾者隨顛腐徃古及來今鬼神鑒如炬何人恣媵阿求

取能越矩矧儂一女身焉能保爾後可惜鼎俎餘陰以

啖狐鼠可惜釵鈿費竭以填谿谷寄意夸毗豈何如勤
秩祐爾雖潔肥膺爾雖載清醑豈不聞神不歆非類胡
爲營營徒自苦

馬跑泉

魏國卿

清源初見細涓涓只是尋常石底泉流出短牆才一尺
便驚雪浪撼山前

神泉傳有馬跑痕騎馬空山覓舊源收盡江南好風景
一鞭紅雨十三村

烟籠賢閣

魏國卿

三賢寓里古傳聞師友交侯閣上分百世清風猶澹蕩
一簾佳氣正氤氳笑他畫棟迷南浦絕勝晴川漾白雲
鼎峙於今馨醑享烟籠舊跡話橫汾

彪嶺樵歌

魏國卿

萬尋彪嶺鬱嵯峨中有神仙謫大羅幾見岡前吹牧笛
却聞巖際發樵歌茯苓老處應蹲虎棋局終時已爛柯
市上往來人不識負薪沽酒醉西河

經上頂山

魏國卿

巉巖突兀撐青空羊腸一徑綿長虹綠崖逼仄夾兩脅
陡從山脊穿雲中往來過客迷今古力鑿何年五丁斧
屏障汾川鎖鑰雄海宇東南此門戶登臨忽見頂摩松

虬枝偃蓋蟠橫峯遍體龍鱗老歲月大夫未肯邀秦封
時排雷雨驚濤起瑣碎羣山皆拱峙松摩山頂頂摩空
肇錫嘉名良有以我來欲問蒼然叟呼吸能通帝座否
恨無謝句足驚人落日驅車重搔首

狄武襄公祠

魏國正

崑崙封一九天險不可渡王師久環攻蠢蠻終負固天
使親把鉞方畧定指顧元夜大張樂讌飲天未曙巖關
忽崩圻虎穴熊羆據龍衣委逝波震霆掃瘴霧李愬淮
西城鄧艾陰平路公本大將材韓范知之素折節受春
秋恂恂儒者度面涅勸軍伍華胄絕依附二事人所難
殆由讀書故古祠崇報功檜柏風雲護負鼓逢盲翁猶
說銅面具

送徐明府同年量移寧武八絕

魏國正

桂籍遙聯楚晉通曾攀清話旅燈紅

甲戌春晤公於鹿泉邸舍

十年

別後無消息忽報神君卽我公

下車三日政聲馳白叟黃童手額時獄市不驚農在野

士林又頌闕宮詩

謂平反庶獄裁行戶勸農及修文廟碑坊諸事

何人關節到閻羅大猾倉皇失揣摩不見秦臺懸鏡處

鐵鞭偏着鬼醫多

邑中胥役頗橫公痛懲之乃戢

負與久假事朦朧一滴紅泉水乳融個是我兒兒類我

青天霧散日當中邑有二婦人爭子久不決公令刺血

及故 驗之立判上二事尤民間所樂道者

目刮金篋鑒最真珠林一顧得奇珍試看月殿攀枝客

早是珊瑚網裏人觀風收李劉兩生是秋皆捷

琴堂風靜畫無譁對客清談興亦賒折簡有時來草屋

為言文舉故通家余閉關久公以譜誼招時亦往焉

文湖芳草露初零有脚陽春去不停十萬人家齊墮淚

笛聲吹折柳條青

北風料峭嶺雲屯琴鶴蕭然出鴈門賸得哀矜心一片

從看塞上轉春溫

徐荆山邑侯由寧武歸里過余留飲賦詩送之魏國正

有母拋雛去一年空從雲外望青天公前蒞汾時有青天之號投簪

過我重攜手戴笠逢君許拍肩拇陣喧闐更漏外楸枰

歷落燭花前來朝又是匆匆別酒冷香消意黯然

狄武襄公祠程學孔

宋時武功誰足數將軍磊落起行伍百戰元昊掃妖氛

畧地攻城闌虜虎韓范二公奇其才左氏春秋授干櫓

將軍折節肯讀書異畧奇謀動人主丹青圖像霽天顏

樞密宣麻冊天府儂高流毒廣東西天兵南討敢余侮

朝廷命將重出師臣青為國奮厥武夜半飛奪崑崙關

賊將見面面如土始信布地百錢紅振旅闐闐奏凱鼓
勲名自足照簡青識量更能高萬古頰邊涅字不肯除
梁公像在非吾祖凌烟閣上多功臣有如公者今吉甫
土人俎豆春復秋桂酒椒漿薦歌舞

戊子夏五由臨邑回汾郡望中見小廟甚整咨輿隸
得其概因記之 徐浩

古洞青山曲相傳有女仙歸來自文水未記是何年十
八邨相奉三千界不遷隔溪瞻畫角疑在白雲邊姓氏

無人識麻田却翠鈿

相傳由麻田遷跡

郎君已逝矣仙子亦飄

然聲入先民耳

洞中昔有人聲今無聞矣

風銷卧虎阡

此地行行問

舊蹟輿隸口成編

題匯清園

徐浩

園亭誰是主憑弔亦徒然修竹依前綠長松獨自豎暮
雲沉白水朝露拓輕烟化鶴歸來後曾孫不記年

宋神宗賜文路公詩石刻

曹學閔

元豐失道升羣佞王蔡紛紛執朝柄偉然碩果推潞公
灌灌老夫留正性河陽出判移魏都身在外臺如棗屏
偶然入贊饗禮成優進公階行賜慶連章乞退仍慰留
改守洛郊被新命瓊林錫宴寵其行祖道簪裾互輝映
宮中寶器出侑觴更有宸章發高詠君臣唱和一時榮

鬚髯廣揚際全盛流傳貞石幾摩挲零落遺闕光志乘
當時中外多名臣曲說何爲惑主聽如公開望冠王朝
曷不疇咨授國政賜詩雖美何足言裕陵遺恨淆邪正
狄武襄公祠 曹學閔
百戰會將宋祚恢穹碑紀績尙崔嵬致身有具從行伍
黥面無妨出將材談笑從容韜畧合儀形颯爽畫圖開
蕭蕭風栢門堂路猶似崑崙甲騎來

故鄉祠貌儼來歆青史威名世共欽帳下孫張才孰並
朝端韓魏契偏深大勛屢向巖疆建浮議休愁末路侵
一種深沉傳智畧要從慎密識公心

鶴鳴古洞

曹學閔

王喬去緱山令威辭華表仙踪一以遙鶴鳴音亦杳何
年有黃冠此間結茆草羽化托靈禽騎之赴瑤島道人
不復還鶴響猶繚繞古洞清且幽遊人恣尋討偶然一
鼓掌嘹唳出深窈山空谷應聲疑和在陰好我愛巖壑
殊攜筇展遐眺琳宮掩靄間雲氣散晴曉冷然風一來
瀟灑滌塵抱長嘯學蘇門招鶴下林杪

臺駘廟

曹學閔

昔聞金天子嘗爲元冥師厥嗣曰臺駘世業克繼之帝
用嘉乃績封之汾水湄沈妣及蓐黃守祀沿宗支滄桑

數變更滅沒不可知傳書晉侯疾茲神實崇爲當時鄭
國僑博物無所遺數語聳君聽血食爰在茲立廟始唐
代棖楠隆其儀水官旣受職胥蠻存有司功澤在斯民
有禱必應時村巫走報賽或降雲中旗願神惠茲土賜
雨無愆期視彼汾流長利賴同留貽

石盤山

曹學閔

花村西去路林岫望中明積翠千巖落孤雲一徑平
翬留絕頂雉堞隱遙城拄策蒼茫處松風走壑鳴

文湖漁唱

馬錦襄

不辨天光與水光滄浪歌處問滄桑漁家風月迷幽火
鱗族烟波是故鄉欸乃一聲雲拂影隱然半櫂笛生涼
卽今望去猶疑練可有絲竿掛夕陽

謁卜子祠

程學曾

教澤西河訪古賢儒先此地有真傳卜山遠接尼山脉
汾水遙通泗水淵鳥語書聲縈嶺上風鳴琴韻過林邊
至今石室誰爲主藤繞苔封不計年

過向陽峽

辛顯祖

五丁鑿破混沌竅劈分兩壁陡且峭中有羊腸一徑通
絕頂瑩瑩燭籠照崗巒凸凹失前路霜皮黛色列古樹
山雀輕翻雉雞飛野狐突跳蹲狡兔懸崖欲墜迎眸來

瀑布飛噴白雲開陰風颯颯疑虎伏曲磴盤迂斜陽摧
欵段崎嶇三十里望中隱隱近村市行人莫唱行路難
迢遞西來山邈迤

遊天寧寺

諸世器

路轉城東絕點塵華巖法界自嶙峋披煙來訪天寧寺
我是崑山第二人

吾鄉顧亭林先生曾寓此

西出秦關北入燕行蹤到此更茫然旃檀林下焚香祝
何日團圞兜率天

予今年自秦入燕自燕入晉

前代儒宗今不見當年尊宿亦無聞念念龍漢三千劫
只有恒河照法雲

此寺向多高僧

一庭黃葉十分清不許牀頭匣劍鳴誰與羈人話桑海

本師幸有鄭康成

時東原以事寓此

滙清園分詠

張熾

青影盈人袂紛紛落酒杯只疑遠山色隔竹暎蒼苔

問青

聞有最幽處軒窗對古松眉公今在否滿徑綠雲封

做眉

幽壑水聲喧尋源到線泉水簾三五處秋雨挂晴烟

泉綠

遊長春觀

張熾

迎人翠柏景蕭蕭古殿殘碑共寂寥村犬生憎城市客

信信如豹吠山腰

柏子無風隨處落與君掃地來相酌暮雲滿岫花滿堤
賭向山頭喚白鶴

唐郭君墓碑

曹錫齡

昔賢錄金石謂可證史事好古與闡幽玩物詎喪志相
里東北隅郭君窳窳寄當年從太宗霍邑剪醜類揮鉞
斬老生穹碑留覩記奈何新舊書紀述辭或異豈其功
太高遂爲當軸忌落日荒原秋摩挲增長喟君名惜糶
糊尙識父嵩字璫椎柘其文舊錄補未備

金石文字記
不載父嵩二字

虻虻廟

曹錫齡

八門城中虻虻廟農人膜拜無老少不知尸祝自何年
斷碑零落增憑弔金風亭長潛采翁昔曾來遊展清眺
翟氏蝸氏稽周官虻虻之名殆相肖吾聞祀典報有功
八蜡與此將毋同但願十日一雨五日風螟螣蠹賊遺
種一洗空汾之陽兮河之東厥田上上畝一鍾春秋報
賽擊鼓聲逢逢將軍之號配百蟲

宋狄武襄公墓碑

曹夢齡

將軍起戎行威名何赫然間代鍾偉人梁公實後先遠
祖絕攀附黥面無須鐫折節讀春秋文武一身全佳城

此山下封崇象祔連巍巍八尺碑樹自嘉祐年高文禹
玉製次道筆法傳我來重摩挲懷古欽鄉賢寶此一片
石爲式有道阡

遊靈岩寺

曹夢齡

清幽那似法王宮結侶重來相里東佛日千秋崇寶刹
塔鈴七級響遙空院深如歷三三徑松古時聞謾謾風
高閣凌雲一憑眺汾川儼入畫圖中

馬跑神泉

武汝明

馬蹄踏破曉山雲一脈清泉百代勲地眼忽開憐卒伍
天心有待厚將軍玉驄芳草春隄合金鎖斜陽碧燄分
漠漠水田沾漑處壺溪流澤接橫汾

鶴鳴古洞

武汝梅

昔人乘鶴去不迴鳴鶴猶疑化鶴來遺響卽今留古洞
遊人何處覓丹臺賓從雲際飄無蹟聲入晴空杳莫猜
此日九臯成悵望可能緱嶺共徘徊

汾陽留別詩

曾三省

劇邑拄撐老病侵鬢鬆短髮不勝簪翦除自愧風雷力
請謁誰投暮夜金幸少煩苛遭吏議長懷清白矢官箴
卽今解組懸輿去襍被蕭條有素琴

別酒頻斟澆冷腸離筵歌舞太匆忙兩年薄宦隨流水
幾處濃陰發野棠項橐祠前春日白祝融城上暮雲黃
南旋匹蹇家山近回首汾陽又故鄉

送別曾明府四絕

程學孔

返薄還淳是所期苦心安問士民知漫云此去風流遠
道路而今口作碑

如公爲政豈謀身酌水投錢有幾人宦篋莫憐清俸薄
本來原憲不憂貧

久從轄下聽鳴絃單父風徽有嗣傳倘若新侯詢舊政
琴堂餘韻尚悠然

翩翩垂柳拂征車此日驪歌暹晚霞祖帳莫嫌多躑躅
從今別後是天涯

辛卯署中守歲口占四首

虞山

爆竹聲聲夜向晨幾枝冷艷報新春卿雲五色 恩光

近中外衣冠拜 聖人

官卑任重載絲綸 聖主何嘗棄小臣獄吏祇知循法
律囹圄無事得身輕

記憶奔馳 玉禁班從遊看盡好溪山不才自愧居人

後常仰 龍顏咫尺間

著策推詳奚足論知幾知命卽春溫邀來薄俸昔 天

賜駑鈍難酬秣飼 恩

續編

送正義先生旋里

胡天游

生平劉季珪高行卓可數異時石徂徠道直物多忤世
網豈不搜其名獨千古吾懷斯人賢今者見餘武汾水
亦何清槃琴聊可鼓

送正義先生歸里

蔡寅斗

行山何峩鬼汾水何瀦洄中有蹇修士古道維風頽馨
香潛發望日垂臺府側席交相推乃以耆儒涖國學六
館濟濟爭趨陪清風挹亢宗峻節攀徂徠從遊入陶鑄
相與知所裁何圖娥眉遇謠詠巧構形似誰爲媒倉皇
就繫對獄吏生徒聞者俱啣哀徑欲結旛訟北闕公論
漸白箝羅開譬若光芒偶逢蝕天風一送揮陰霾先生
無恙驅車回譖人譖人安在哉會須一笑空織埃丹鉛
有暇扶筇策綠水青山任往來

奉贈無蹊先生

周長發

先生不愧號人師香草偏教溷菘蒹止棘青蠅何遽集
還山白髮未嫌遲前身定是胡安定後學應呼韓退之
六館舉旛留未得經過槐市有餘思

無蹊先生三十像贊

任仲周

德滿如其頰學廣如其額胸洞猶面瞻懸猶鼻智何在
在其眸之漆義何在在其鬚之戟五車之書舞其眉千
秋之業抱於膝而鎖日閒窗握管吟哦者又將自著一
卷閒磨墨

先生多有著作
自云閒磨墨

樓山園

魏駟

呼吸疑通帝林巒一望收人間心自古地爽氣如秋草
色通幽徑嵐光上小樓登臨終不倦何用問瀛州

白彪山

張元慶

東遊未躡岱宗雲且隨流水訪彪麓彪麓之氣嘗氤氳
中天不散靈光矗點點青螺湧前溪絲絲嫩柳搖平陸
蠟屐逡巡度石梁峪口微風夾春服斷崖垂絕引鷺叢
陰磴欲飛盤蛇伏危峯直指碧天齊行歌樵子傳空谷
我來掃石坐綠茵山花爛熳山醅熟呼客同和紫翠吞
醉來擬枕雲根宿

自武家園至馬西看卜山

賈健

汾上看卜山真形祇得半土岡層層遮坡麓如隔幔可
惜美人妝統扇掩半面我來汾東北大鹵分界限村曰
武家園馬西爲憐串中低畫石灘北望商巒燦萬仞蒼
蒼然壁立何葱蒨山根至山巔咫尺留青盼綽約姑射
姿彼美全身現頂冠芙蓉髻緯衣繡石雁突兀起平原

紫翠傳螺旋溪帶石交縈樹雜花爭絢攬勝得其真公
然仔細看下有卜子祠煙嵐擁樓觀隱堂尚巍然游歷
惆未遍何當賦卜居仰止慰懽怍

望春村

城東迎春處

東望望春春可憐唐句迎春村外立春天自從此地迎春
後處處春光在眼前

一線泉

源出城北三十里熬坡邨泉流如線清冽異常供
上莊村成家莊汲飲

一線靈泉清不渾泉聲瀼瀼走雲根雖然勺水難澆灌
汲飲居然給數村

卜子賢跡

子夏山前有愛子村喪子坡想子原不僅石室遺
跡也

子夏山前愛子村留芳豈僅隱堂存西河處處昭賢跡
喪子名坡想子原

贈月岩先生

楊珏

解組已十稔問年剛五旬生平松節概晚景鶴精神囊
橐宦彌痛文章老更新高齋時一過恬澹得其真

贈月岩先生

韓衍芝

波翻宦海幾揚塵幸脫樊籠羈絆身百累但看鳴仗馬
三緘直欲鑄金人歸來高卧辭彭澤逸去披裘釣富春
六載荆山成底事一官贏得老來貧
樸園小築富林泉心遠端知地自偏種樹高低二畝蔭
栽花黃白一溪煙無人對酌飲嘗醉孤興揮毫詩每傳
多少軟紅塵裏客始知蕭散卽神仙

題魏西銘洗硯魚吞墨圖

史貽直

清癯神骨自翛然魚入芒屨羽扇邊幾點新荷纔貼水
十圍垂柳鎖舍烟呼童洗研消殘墨坐石題詩拂素牋
滌盡煩襟宜小飲畫圖深處曲闌偏

前題

汪由敦

天地一何曠物我皆崆峒蓮性不受暑疎柳來清風何
以滌我懷心與造化通潑瀨乘湍激機忘出沒中卽景
得真會兀坐意無窮

題張氏雙烈傳

曹學閔

天地有浩氣直養全其剛聖賢有至教樹立當自強所
爭在一念乃流百世芳我讀雙烈傳得之汾水旁婉婉
儒家婦鴻案各相莊無端失所天矢死賦偕亡相去未
而月奇節萃一鄉一在陽城里一在田屯坊雉經不旋
踵絕粒無廻翔其事有遲速其志本同方吁嗟兩烈婦

元爲吾里光或云赴義者從容逾慨慷又云古孝婦職
在奉姑嫜遂謂節烈事於義或有傷此議雖近是管蠡
難測量室中有姊妯膝下無兒郎從一而已矣此外更
何商我聞古忠臣意氣多激昂存則與俱存機不容毫
芒况茲殉夫志一往非幸嘗惟此真烈氣日星同焜煌
足以振頽懦足以扶綱常悠悠藉口者請視此馨香
爲宋孺人節孝作

天地有正氣賦畀無參差所以磊砢節不必在鬚眉賢
哉宋孺人大義能自持絲蘿附仙李雍雍賦唱隨一朝
失所天同穴志不移先後有宛若懷抱無呱兒視彼溝
瀆諒此意空自悲高堂代子職猶子衍宗支慰彼泉下
人節孝由秉爨

午日滙清園 魏國卿

恰逢載酒興午日過園林翠滴千畦竹泉鳴一壑琴石
欹扶客醉禽語和人吟曲曲尋歸徑花香襲滿襟

泉上謁賀虜將軍祠

北魏將軍廟西河潤濟侯一泉生馬足萬頃荷神庥賽

鼓迎春杪吟鞭繞陌頭彪嶸峰頂石龍駕嶺邊湫

最高卽白彪嶺 柳眼迎人媚鶯吭渡澗幽何如謝公屐
壑口橋曰龍橋

千古此清遊

和呂進士學三馬跑泉韻二首

馬跑何代出名泉灌遍壺溪遠近田乍拂寒島淨積翠
試聽絕壑響哀絃雲山斷續迷金鎖山後古石徑高低
引玉鞭浪說桃花尋古道知從底處覓神仙

遨遊貰酒訪清泉天一池邊碧草連神馬一蹄開地眼

征雲千古護山肩

有賀虜將軍祠

鶯聲繞谷迷花雨春色撩人

醉柳烟景物感懷饒客興吟情高並翠峯巔

文湖漁唱

昔年滄海變桑麻幻指汪洋一望賒澤畔不存藏網室

歌聲猶憶唱漁家何來荻港垂新釣那得桃源泛古槎

我欲招招呼返棹問渠可有水梭花

鶴鳴古洞

仙人駕鶴知何處此地猶存鶴洞名萬里飛飄雲外影
九臯鳴應掌中聲非關華表傳丁語却憶梅村伴子行
紫府長春山不老幾從清露想遙情

線泉

清泉瀉石暗玲瓏直緯橫經一脈通碎落珠璣飛峭壁
輕移絃管出蛟宮涓涓細滴三春雨颯颯涼生六月風
幾片白雲流不盡翠巖嘗漱月明中

望卜山

魏國正

城北開屏巒一痕青未了朝嵐鬱氤氳晚翠靄空杳石
雁影有無石室雲縹緲昔賢此遯跡遺經闡大道龜
遠脈來睥睨衆山小生茲君子鄉仰止厖夙抱九節
虛仙筇三山悵蓬島何當拾級登瓣香親拜禱

馬跑泉懷東西魏事

東賀六渾西黑獺沙苑邗山歲戰伐將軍誰歎此駐師
渴驥奔泉鑿靈窟鑿靈窟通神泉巨浸浩淼聲潺湲一
時甘冽飲疏勒萬古膏腴滋野田縱橫鍤畚渠百二狼
戾篝車禾十千亦有瑤琮響碧玉况復沮洳連汾川神
功不朽在潤濟生前汗馬亦細事異代侯封視四瀆社
鼓椒漿答神賜可憐移汾築汾空爭持鬼餒求食無人
知涼風堂側泣明月古戍城荒卧老羆

學三積閒堂讌集

積閒堂畔初雨晴溽暑迴避涼颼生滿院滿目花盈盈
秋光搖曳來吟情招客筵開北海觥金刀剉膾銀鑪烹
主人坐起酒數行不訂酒政訂詩盟簾外蓮花花數莖
嫣然無語解逢迎諸公四坐皆賢英對花幸勿吝投瓊
卜陽老人專持衡詩壇約法何嚴明詩闡厯落珠盤擊
筭題拈韻毋紛爭荷蓋蔭水荷珠傾魚秧初出蜂衙清
鶯簧蝶拍蛙鼓聲蟬琴樹杪相和鳴各以景物名其名

儘供詩料催詩成羣賢走筆縱才橫短章長什琅玕呈
酒氣淋漓阮步兵五言馳逐劉長卿側席我亦備饗羹
詩壘欲撼如堅城吐茹短澁顏發頰拈毫布紙停雙睛
求免金谷罰金罍敢問詩場鼎重輕詩成落日銜山平
客辭主人戒歸程一時花鳥欣向榮居然四美二難并
爲賦長句湔餘醒

題家西銘兄小照

巽巽卜山山之陽潺潺汾水水之旁山水環清騰榮光
中有畸人才無雙無雙才調由天賦况復長綆時汲古
汲古畧觀大意耳恥向陳編考魚蠹廿載投筆棄丹鉛
掉臂遊行齊魯間運謀自許陳曲逆排難人稱魯仲連
閒拈不律吟情寄老宿專家席退避天人術數驚鬼神
先生元只當遊戲懸河之口詞堂堂馳檄須臾數十行
盤根錯節別利器問途偏不避羊腸羊腸可畏古今爾
半世風波亦坐此囊底智足衛其生雉罹於羅雉不死
行年五十老將至掩關不欲預人事湖山石畔晚涼颺
呼童洗硯滌塵思畫圖一幅春風生藕花柳線點幽情
石邊兀坐者誰是西銘先生家巨兄

三賢祠 錄二

道源一脈在西河十載離羣獨嘯歌泗水波流汾水遠

汾陽縣志 卷十四
三
尼山雨化卜山多馨香鼎峙稱三傑文學專門列四科
夜雨秋風讀書處依稀猶聽有吟哦卜子夏

賢侯幾度式賢賓可友其如不可臣自是清高成故我
豈因貧賤敢驕人心傳東郭幾形解跡遯西河自葆真
鼎足千秋當配祀可知世外有芳鄰田子方

懷任方來

書生那慣涉風波猶憶臨歧嘆奈何別後都無書問訊
歸遲空有事蹉跎尊前明月看依舊關外春風度未過
白草黃沙滿征轡也應回首唱離歌

喜王兆公見過夜話

燈開碧穗酒紅鱗戶外冬寒戶內春勃窣窟中橫塵尾
渾茫天際引尻輪君言自昔佳於我交道如今豈有人
百尺長繩有可續相將其汲莫辭頻

學三近障於理詩以讓之兼廣其意

講堂高唱說濂閩糟粕憑誰辨覆眞久矣周旋寧作我
奈何轉換只隨人蜚丸自認爲靈藥麻飯從知是積塵
桃徑蒼茫漁艇近紛紛指點說迷津

偶逢螺蛤卽涎垂自有天廚自不知老厭經書謀作佛
病耽方藥妄求醫文成仙去難爲諱柳泌丹成易售欺
一服清涼宜猛省好將惡札付茶毗

哭程紹洙

耳語紛傳信未真風聞早已暗傷神家無一木堪支厦
學折三肱不療貧負骨同翁歸白首招魂有母哭青燐
可憐魄冷吳江上猶是前宵夢裏人

前數日猶夢與紹洙話如疇昔

題卜陽老人小照

三首

一片青氈拂袖歸水舟陸屋間都非破琴還有溜樵曲
彈罷遙天看鳥飛

解衣磅礴搗鍾王敵國家貫墨數行未肯換鷺惟換米
無勞苜蓿說鱸堂

放浪乾坤七十春不聞嗟老况嗟貧畫師巧貌應難肖
難肖三千界外人

卞玉光才高久躋其子並雋才同補博士弟子員詩

以寄賀兼諱之

四首

爭長文壇名父風連鑣一出冀羣空行看老鳳借雛鳳
兼校雌雄六六中

十歲冬郎卽席詩四筵膽落氣如絲譽兒也有王家癖
未似樊南譽衮師

卿才卿筆與卿詩除却卿狂盡有之惟有桐花千里路
飛鳴休更學卿癡

壯歲曾陪阿父遊眼中虎子訝吞牛年來沈約顏唐甚

爲愛梅花讀未休

過汾陽答陳明府翼亭 張開東

舊侶招邀驛路西汾陽城上暮鴉啼遙懸一榻歡相待

便下單車病欲栖 時病餘以呂仁原昆季邀之臨縣過此浩浩主人渾似

海縣縣勸客醉如泥西河石室今何在萬古蒼茫費品

題 汾陽舊傳有子夏石室戴東原辨其誤邑人曹光祿慕堂論有異同

汾州府郭外呂廿二仁原攜酒策馬追餞車前感山

路遠送三百餘里黯然爲別

十月出太原臨縣來雙簡與子約不齊歲暮亦何晚三

年不相親千載此一見秋風大梁城落日闕鄉館望遲

北道車心逐南飛雁匹馬度河汾重山及湫澗 秋水遶臨縣城

前年壬辰冬約仁原癸巳夏會於闕鄉荆山書院今年甲午夏復約九月仍會此地及九月廿後仁原以鄉試

返至闕鄉十餘日候余至恐其相左乃追至臨縣我病亟欲歸去住多憂患袖

子數行書請爲方伯斷輿馬趨邊城簸搖歷修坂覲面

口難言攜手淚在眼故疾我復作藥餌兼供饌夜爲煖

衾稠朝勸加餐飯冬至漸陽舒痼癖亦稍減差日始登

程連騎獨纒縵崖雪凝堅鐵溪水滑玉版僕輿重代更

肩乘勞推挽 驟轡行一日冰滑恐傾跌仁原另雇衣陶盧州夫八人坐肩輿三日抵汾陽縣

穴烘短榻茅簷覆長棧狼羣輒呼號虎跡時經踐囓囓

黃蘆峰仡仡青要彥地險資良朋天高窮勝覽炙雞喜

汾陽縣志 卷十四
充腸蕪酒強盈醜微吟騁晴暉行行脫偃蹇精神共渙
發裘帶殊輕緩天涯幾人同嘉會興不淺過征莫忍辭
疾驅忽來餞城南數杯傾車聲從茲遠

題田又起謚彙集 李治運

作詩亦何爲宜僅適所觀源流具三百言志斯味嘆古
人不可作古調誰獨彈卓哉田使君人世迴狂瀾磊磊
復落落星斗貯膽肝襟懷一抒寫浩氣盤毫端庭華篤
常棣宦轍修金蘭豈無風月形觸目慘不懽紛紛惜流
俗自責尤其難我生亦何幸先後當同官言談絕齟齬
形迹無剗剗此意苟不諒視茲江漢干時方塵霖雨坐
共苦爍乾展卷深二復頓使枯腸寬相期在古處金石
永不刊

東耿順之學博 徐儲

順之磊落人是我同心友晨夕事過從興極便呼酒耳
熱匣劍鳴意氣貫牛斗相要在終身相期在不朽嗟余
爲飢驅倉皇別左右襍被新田來卜居但一畝風雨誰
與親丹鉛不離手有時對短檠昏夜繞牀走徙倚檻前
竹婆婆窗外柳慷慨還思君苜蓿味何厚兀然自成醉
無事似犀首倦起卧寒瓊紅日已當牖胸次無塊壘清
齋絕塵垢獨立蒼茫中高情有誰偶

題汾陽曹氏家慶圖 紀昀

房中合奏琴瑟鳴堦前
茁秀芝蘭榮春風藹藹滿畫卷
世間真樂惟家庭宗丞昔住
歡喜地曾以佳話傳丹青
當時寫照吾及見彈指幾度
歲籥更麗公夫婦均證果
飄然撒手懸崖行柱史農曹
好兄弟惓惓父執猶多情
偶遊舊宅一展閱撫今追昔
百感并念公在日耽禪悅
時揮玉麈譚三乘佛言因本
自心造如繪畫工筆所成
又言心如大火聚五言種種
無留形獨有無相無色地
靈臺炯炯長明燈去住成壞
同一致滅無滅本生無生
公今雖往公自在虛空本性
非形聲偶然留此粉繪迹

境過宜復多牽縈譬如明月
照寒水水中之影亦月明
豈知色空兩不染冰輪自轉
江自澄嗟我未能離世法
頗傷舊友如晨星詩壇酒社
夢猶昨對此不免心怦怦
何殊結習消難盡沾衣點點
天花停會須一訪維摩詰
焚香聽講金剛經

受之侍御新作
金剛經條辨
法式善

題汾陽曹氏家慶圖

慕翁官諫垣抗疏陳辟雍
特詔示優獎盛典欣重逢
給諫承世德鯁直希前蹤
請修上下舍亦蒙 恩允從
橋門璧水間歌頌諧鐘鏞
固由 天子聖啟沃何從
容今觀家慶圖三代皆儒宗
世間浮名譽不滿春風胸

石雲蔭庭日勁竹交長松百歲古藤花一任寒苔封開
窗納西山歷歷青芙蓉許我屢登堂隅坐嘗庖饗孝弟
心油然而酌彼春醪濃

樂遊詩三十首之一呈定軒前輩

紫藤花下日月長翠微山色吹滿牀老境頗薰知見香
幾杯濁酒寄歌哭放曠之中見眞樸諫草何曾教世讀
三舍重修君指陳青衿墮淚黃槐門碎雍鐘鼓何人論
君尊甫慕堂前輩 奏建辟雍

題汾陽曹氏家慶圖 李鑿宣

生平未識先生面今日披圖畫中見仁智之性竹柏懷

眼光炯炯如飛電婆娑白髮舉按人一室相敬本如賓
元方侍右季方左好風吹到庭階春髮媿繞膝四公子
桃花醜面白於玳先生墓木今已拱畫中人物還如此
此情此景不再來此圖此畫須徘徊喬木參天奇石秀
莓苔滿地蘿軒開吾聞先生晚歲厭簪紱跌坐學仙復
學佛脫屣應生斗率天拂衣早度耆闍崛子孫衮衮皆
象賢堂堂鬻鬻人中仙一華一木勤護惜紫藤依舊長
風烟我今題詩三嘆息姓名謹書圖畫側孝子筆墨賢
子傳世世雲初思祖德

奉懷定軒先生卽次都門送別原韻

朔風刮面來刮面面生垢襟上垢堞塵積有一寸厚黃
昏狐兔竄白晝罔兩走 君恩寬斧蹟罪譴更誰咎

側身隸戎行感激倍抖擻馳馬祁連山長刀衣短後檢
君贈行什別君嗟已久君爲諫大夫亮節播人口閉戶
著周易立言垂不朽研理數弗違羨彼膏肓守茫茫六
合中能得幾石友磨盾和君詩春寒尙龜手

聞定軒先生引疾歸里詩以訊之

四首

昨夜風雨來飄灑入 牖晨起慘不 思君獨搔首思
君一何深別君一何久攬衣 高原高原復何有不見
黃金臺但見大堤柳聞君賦歸與此 決與否富貴如
浮雲白衣幻蒼狗

我昔罹世網荷戈天西陲感君遇我厚顛踣相扶持臨
歧一握手珍重好言辭至今衣袖中懷君贈行詩候雁
南北翔隙駒東西馳君今遂初服我猶繼塵羈

仲氏早見幾考槃賦邁軸君亦歸去來三徑對松菊賢
哉兩弟兄白首共高躅作社赴雞豚耦耕侶樵牧誰識
簪組儔依然抱黃犢

自我輪臺歸五年兩見君薄宦寡良覲尺素時相聞君
方理征鞅何以慰遠人世間有離別徒以滋愴神世間
無離別何以見情親以我慨分袂知君慨離羣

朔風刮面來刮面面生垢襟上垢塵積有一寸厚黃
昏狐兔竄白晝罔兩走 君恩寬斧蹟罪譴更誰咎

側身隸戎行感激倍抖擻馳馬祁連山長刀衣短後檢
君贈行什別君嗟已久君爲諫大夫亮節播人口閉戶
著周易立言垂不朽研理數弗違戔彼膏肓守茫茫六
合中能得幾石友磨盾和君詩春寒尙龜手

聞定軒先生引疾歸里詩以訊之 四首

昨夜風雨來飄灑入我牖晨起慘不歡思君獨搔首思
君一何深別君一何久攬衣登高原高原復何有不見
黃金臺但見大堤柳聞君賦歸與此意決與否富貴如

浮雲白衣幻蒼狗

我昔罹世網荷戈天西陲感君遇我厚顛踣相扶持臨
歧一握手珍重好言辭至今衣袖中懷君贈行詩候雁
南北翔隙駒東西馳君今遂初服我猶繼塵羈
仲氏早見幾考槃賦邁軸君亦歸去來三徑對松菊賢
哉兩弟兄白首共高躅作社赴雞豚耦耕侶樵牧誰識
簪組儔依然抱黃犢

自我輪臺歸五年兩見君薄宦寡良覲尺素時相聞君
方理征鞅何以慰遠人世間有離別徒以滋愴神世間
無離別何以見情親以我慨分袂知君慨離羣

題汾陽曹氏家慶圖

吳錫麟

十年喬木百年人樂到庭闈味始真誰與草堂添氣象
好風吹遍一家春

紫藤花下記追陪轉眼春風又幾回影裏婆娑雙白髮
夕陽猶自照銜杯

倚閭心事念今宵夢到西泠第二橋明日掛帆丁字水
歸心我更健於潮

題曹定軒侍御訪梅行看子

二首

迷迷入望白於雲雪與梅花迥不分肯放一梢寒綠出
也防修竹有彈文

萬蕊千花著意攢紅衣官路不知寒若教驢背馱余去
奉敕郵梅更好看

曹定軒先生以馬秋藥句自寫小照屬爲之贊

朱文翰

花以香妙香從花起聞乎曰聞無隱乎爾云何畫手點
綴清妍於其香處無能曲傳嗅根鈍置有何功德請畫
中人觀鼻端白斗室非小足與天遊須彌芥子大海一
漚云何畫師貌來惟肖些子靈台偏難寫照覓心不得
寫修太平日無心處卽大光明

斜街行爲定軒侍御賦

翁方綱

斜街紫藤高出簷金花帖子錦疊函二十年前聞喜讌

猶記藤花香滿簾爾時蘭陔杏苑詠已報熾燭重重添
鳳雛鶴子鳴相續鯉庭鸞掖聲聞卜君不見斜街喜氣
鄰比外郎營金榜前頭唱姓名曹氏書倉傳世業王家
解字辨形聲侍郎昔日夢三錢街東錢家今亦三世聯
紫雲軒下新詩話一榜萊衣續擴言乾隆乙丑會試闈
中錢香樹先生夢
空中懸三大錢是科相人分枝得茶山也今科高郵王
氏秀水錢氏與君家皆三世入詞林故并及之唐擴言
曹汾尚書鎖許下其子及第一時賀啟有萊子新衣語
嘉慶己未夏五月賦此詩

太平村訪曹鏡源農部 二首 黃鉞

聞君解組歸來後直把城門作虎溪今日相逢成一笑
山深莫遣杜鵑啼

村外青山一桁橫白頭二老話柴荆猛思四十年前事
膝下諸郎尚未生

九日同劉虎文李果亭司右湯潘雲亭汝瀾汝淵相
里寨登高歸途訪相里太師碑暨崇勝寺北齊石
碣 曹錫齡

九日汾川道秋風吹淅淅素心六七人相里崇岡覓逸
遷絕頂來探手參井摘層空鳥背過遠樹烟羃歷古刹
黃花開對之塵襟滌摩挲太師碑遂訪北齊迹古人忽
已往感慨心如怒歸途月在林勝遊紀歷歷

題田鐵舟太守小照

壺中曾濯魄瓶裏更傳神蓮露清無比天漿吸自頻每
逢秋水賦疑到夜江春悟澈光明境參來自在身虛摹
心鏡朗圓抱意珠新五馬風流別溪藤寫照真

謁卜山書院敬賦長律示諸同學

文學千秋上宮牆數仞前登堂遵禮後

禮後堂爲傳青主先生題額

服教念薪傳東魯源真遠西河澤最綿卜山長仰止石
室故依然俗已恢唐魏風猶式段田輝煌三晉典掩映
四科賢秀發庭中草祥凝閣上烟彙征原叶吉繼起必
開先湖闊文光瑩峰高雁影聯

文湖石雁皆邑中名景

未須譏末

也合共勗修焉勝概標諸邑宏規亘萬年崇儒逢

聖代絃誦溢汾川

法興寺象槐

寺在汾陽太平村有古槐一株老幹槎枒土人因

以象槐名之

豈是瑤光故示奇槐庭垂影日遲遲攀條忽幻荆山美
生意居然皐澤宜佛地流輝應列市酒泉成賦自隨時
倘教移榼靈和殿

法駕還能備令儀

題二張烈婦傳

曹祝齡

矢志擬松筠松筠懼殘缺矢志擬冰霜冰霜慮磨滅視

死一如歸慨然創奇節哀哉二張婦後先同節烈想當
就義時中心何慘結死者不可生生者復永決仰顧堂
上人肝腸欲摧裂欲存固不能欲亡難爲別與其一身
存高堂重悲切不如就黃泉此情庶決絕殺身以成仁
居然志士列二烈紀一編終古留貞潔

晚過顯慶寺

田畿

夕陽東嶺去信步入園林暮色上人袂鐘聲清我心隨
溪三四折僧院杳然深爲叩無生法還過綠竹陰

六兼園呈伯叔父

二首

寒梅修竹舊名區此日追尋物態殊小鳥有情啼未歇

好花無恙影低鋪拂雲空見留雲閣踏月愁看拱月湖
不分元章袖中石飄零也復散庭隅

遇末封胡最末行竭來吟望足悲涼白彪獨峙英靈散
碧樹行彫景象荒架上書殘添鼠跡池中水涸露魚梁
何當偷得閒中趣檢校河東綠野堂

題曹鏡源先生生雲精舍

任伯寅

昔年猶記附龍鱗綠水芙蓉亦自珍閨苑不堪隨鳳侶
桃源欣得逐仙塵移來絳帳春風暖聞道休亭燕子新
從此竹林陪宴集可憐南阮不知貧

輓曹鏡源先生

三首

宋其沅

正苦炎氛熾開緘心頓寒如何諸老輩半作古人看先
王卜崖祁鶴皋兩先生計又杖履高風渺林泉樂事闌
得此信不勝老成彫謝之感感空將千里淚西望故鄉彈

出處分明甚平分廿載餘先生自己酉通藉至壬戌解
組計十四年自壬戌至今乙

亥亦十桓寬鹽鐵論范蠡計然書行業存家乘精神返

四年太虛惟留芝室月清夜上階除

昨歲京華住風規尙巍然忽聞哀訃到回憶已經年雨
外雲猶裊壺中景不延藏書看滿架猶幸有人傳

題魏奕唐乘槎遊秦兩集四首李發英

乘槎興欲凌滄洲傾倒詩源汝海流仍借劉郎題健筆

八方風雨會中州結用劉夢得語

鼓鼙動地甲連天無敵王師將有權憑杖詩才爛凱奏

捷書旋是到甘泉撮遊秦草聞大兵剿賊第五首大意
此詩蒼莽渾堅高調絕唱自是洗

花嬌派循環雜誦比於金湯之固

秦晉東西隔一河用遊秦草
雁門司馬恨如何
先生語

司馬指孫祇應心壯郭忠武槐影重疑雲陣多唐
人經

白谷先生重臨歌舞詩云今日重臨歌舞
地古槐疎冷夕陽多

安能王猛當桓温眼界無人有虱捫指讀史感懷
第一首

烏金思鑄錯風來月到細評論詩有云縱使有金難鑄
錯又五湖自富閒風月

鐵鳳歌汾州知
府象曾

西河環繞山崔嵬撐空一氣排雲開斜抱郡城走東北
 忽然掉尾峰巒回絳巒回處峰形幻何年叱石成羣雁
 其羽載戢風載颺俯瞰城中官民患官民交患何可當
 鎔金為鑄雙鳳凰廉吏精誠資捍衛山靈偕伏報嘉祥
 我聞雨暘占時若遂有大鳥巢阿閣上翔千仞覽德輝
 陋彼堂成來燕雀又聞化洽風俗移時有鸞鷲鳴西岐
 集曰歸昌晨應世凡羽豈敢爭雄雌竭來雉堞周遭步
 摩挲古物增遙慕繡起斑駁具神威陣字微茫墮煙霧
 誰與作鎮挽頽風前有劉公後岳公鶚薦鵬升略相似
 蝗遷虎渡將毋同新詞欲倩楊雄吐志未全伸借詩補

鳳兮鳳兮用為儀永奠此邦萬萬古

壽叔父農部公六十 曹汝淦

昔有孔若思官至郎中爵石水置座旁持以示知足莫
 謂古今人度越不相及維予農部公高風誠可挹弱冠
 登賢書禮闈九試捷觀政入農曹會計功堪錄尋復校
 秋闈分司添鳳燭得士十六人玉筍班竒特汾水起秋
 風尊鱸念轉切翩然賦歸來閉門耽卷軸啟後與承先
 渺躬任其職築室號生雲胸中具邱壑兀坐靜觀樓四
 時佳興適載酒話桑麻故鄉誼敦睦置身名利場焉識
 田園樂恬退自無求靜裏觀消息未盈即思虧寧有虧

之日乃知服官存此心定無躁進失處世存此心知止
自不辱立身存此心歸真而返樸茲慶甲子週精神倍
矍鑠庭前植丹桂樽中泛黃菊願進南山篇稱觴介耄
耄

給諫世父以孝友睦婣任恤顏其居詩以紀事

曹汝涵

懸車梓里謝朝簪六行書爲座右箴三世清華承緒遠
一編官禮繫情深名登道籍稱人瑞望重儒林比國琛
裕後豈資千樹橘貽謀遠勝滿籬金魯論夙昔曾研究
羲易生平費討尋擷取精華垂著述著有四書集粹周易集粹含茹
義理豁胸襟特崇彞訓終身佩擬受徽言九德欽瞻願
題顏神倍悚諄諄啟廸想深心

煮藥篇爲家雨田孝廉作

李榮達

雨田父病膈割臂煮藥稍效旣轉劇復刲股父歿
泣血負痛奔走營殮母察狀有異固詰之始以實
告人始稍稍有知者此庚寅夏事也念哀毀之際
恐傷孝子之心未敢遽形筆墨今雨田釋服已久
爰叙此事以告世之事親者

父病膈兒煮藥乘無靈兒有肉肉可活父肉可割

心解

急覓及不擇利鈍以臂當及及屢頓聳肩受及猛一奮
血肉淋漓心手硬二宵然空房痛極繞牀此時鬼神森

在旁三更煮藥成捧藥進父嘗三翌日父痛良可支漸

進酪漿飲稀糜戚黨看視不猜疑却道病當退天遣遇

良醫四未幾逾月父病轉劇兒肉縱無靈兒志則已決

以茲獲前效三更閉門再煮藥五心生急智巧力全敲

針作鈎繫以絃以絃繫釘針倒懸以針鈎股肉隆然手

揮霜鋒如揮鞭劃然一片殊輕便誰知力已盡力盡難

回天此時鬼神應涕漣六吁嗟乎誰無父與母誰無臂

與股有臂有股無父母我吟此詩汗如雨七

四月六日招同胡蒼巖山長高鶴圃蔡荔耕廣文王

西堂家雨田兩孝廉武齊圃張綠堂李海門三茂

才白受采上舍游石盤山歸飲芸香書舍次蒼巖

先生元韻

先生罕俗交高踪爲我貶因之陟西頂荒苔屐齒染歸

來動吟興筆力赴奇巉讀詩如讀畫入勝以次漸字裏

與行間捫之起石礮想見初入山是日余未陪游人家隔西崦

探幽戒匆匆詎愁日將晚杖履擁雲霞登頓力可減極

頂恣盤桓衆山供一覽綿聯方若交陡斷忽如斬雲樹

鬱濛濛烟村荔點點平田繡望列遠黛眉痕儼飛甍日

騰耀陰谷風彪鬪道人煮山茗稍憇藉松毯舊碣矗穹

隆字跡未污默可惜開山人寺爲朱滄起先生創修勢焰如電閃

分場縣志卷十四藝文

詞張百舌言飾敗麗鼠膽不計身後名遺羞難磨刻徒
然飾廟貌姓氏碑中嵌先生著論嚴原詩有掛冠櫛星
門之俊怯不敢句
宥彼吾豈敢摩挲元武碑元武祠有李子德所撰
碑文及傳青主所書碑清濁
雜楹檻名污意鄙棄品高心矜斂太原傅山人霜紅結
崖厂闕中李子德辭祿符止坎偶來游茲山飽將山色
啖還向茲山瀉文字發怪險更鑄先生詩鼎足允無歉
却愧助吟懷蔬薄村醪淡

次韻蒼巖先生同高鶴圃由峪道河至白彪山下觀
原水所出

遊不拘日時飲不計斗斛昨日山之巔今日水之曲灑
墨銀光箋簇簇生新綠瑰詞抉幽奧快意眞發覆前詩
狀山景筆峰何高矗茲篇繪水聲如聞奏琴筑山水羅
胸中先生意乃足愧我困末學爲文學干祿何日屏塵
綠此事闕清福名泉咫尺問從未涉遊躅先生飄然往
山靈敬相速是時雖苦旱景物媚清矚麥浪烟塍湧山
櫻露園熟地偏氣象殊峰迴徑路復忽訝雷砰訇水輪
翻地軸沿河多
水碓秋種亦已布隴畔眠碌礪夏田分渠漑
處處濺飛瀑桑陰來盍婦柳塢鳴鵲鷓鴣漸進窈泉源澄
泓凝碧玉淨宇俯山椒林箐何繁縟門外駭浪喧奔騰
衍湍洑馬跑詫神奇傳言縣志錄安得汾上田盡如此

間沃有山卽有泉共慰豚蹄祝我欲棄筆視此間構茅
屋膏腴數十畝四時課耕劬奈乏買山錢清夢縈林麓
載歌考槃篇幽人獨寤宿

鐵鳳歌

汾郡多山北山崖石錯互有似雁形俗謠云石雁
照汾州清官不到頭明太守劉公

一佳

作雙鐵鳳

於北城上以鎮之嘉慶庚辰太守岳公

祥

繼鑄焉

往歲西河書院以之課士象思齋郡伯有擬作一
篇偶與友人談及因亦作此但詞旨支離恐無當
於大方也

我聞漢時鑿昆明跨池刻石騰長鯨又聞將軍馬新息
愛馬鎔銅作馬式良馬備戰爭長鯨吞巨浪鎔銅刻石
總徒然盛世文明非所尙君不見丹穴山頭九苞禽時
清鳴集高岡上吾汾形勝號名區城北林巒互鬱紆何
時石化隨陽鳥傳道難還合浦珠賢守因之捐鶴俸城
頭特鑄雙威鳳藉把民謠一滌除至今美蹟人爭頌當
年手握玉麟符愛民何異鳳將雛不比鷹雕徒搏擊戴
仁佩義民謳衢永泰門高靄紫氣朱樓飛翼本齊雲一
從作鎮蹲靈鳥瑞日時含五色文五文祥彩照清宇岳
公遠繼劉公武清風一鶴早高騫德輝共欲昭千古律

協歸昌傳雅樂新歌漫擬資揚推况值 熙朝德化隆
佇見鳴岐來鸞鶴

早秋滙清園 四首

隔欄紆通徑亭軒入望明泉聲排石健竹氣迎讀去人清

古栢蒼虬影幽花靜女情空餘觴詠地猶憶主人名園爲

朱滄起別墅
今歸張氏

分泉通竹塢疊石擁松關一往無平勢四圍多好山池
魚不任釣徑草未全剛安得攜琴酒從茲數往還

夙有煙霞癖茲遊愜素心一襟涼影淡雙屐綠雲深花
面因風轉山鬢得水臨靜吟無和者谷鳥報清音

野懷初浩落秋色此平分雜樹交陰靄孤亭俯夕曛靜
中渾覺雨幽處欲藏雲坐久不知晚樵歌歸路聞

禹門河觀漲

彪嶺開殘照龍泉飲斷虹峽雷初過雨石浪已驅風勢
挾雙崖走聲催萬馬同峰迴如力障湍急儼排攻寒氣
昏林逼衝波別岸通岩鴉驚避穴山木舞摩空澤潤千
畦外源傾萬壑中憑高思禹績疏鑿仰神工

狄武襄公墓碑 韓昌年

日星河岳鍾英靈武襄炎宋推名卿偉烈豐功垂不朽
廟食千古留香馨我詣公祠謁公像更拜馬鬣瞻佳城

宰木已伐翁仲毀墓道有碑碑無亭岐公撰文御篆額
 煌煌炳炳摹忠貞春明學士書勒石瓊琚玉佩昭芳型
 好古阿誰宿碑下蔓草鋪地荒煙橫竊恐年久搜剝蝕
 戈波漫漶難分明吉光片羽尚珍惜忍教墨寶悲沉淪
 小築數椽碑可庇免教日炙兼霜零太息作歌詠來者
 呵護聊慰維桑情

新修汾陽縣志跋

史氏重家學談遷彪固世繼其業尙已方志爲史家之
 支流師授亦必有淵源叙述討論始克有所折衷而不
 戾於古昔廣寧黃大令朝端創登封志從子堽續修之
 堽族兒聖誥復因舊本重修一姓相承遞相撰輯藝林
 託爲罕事吾汾邑乘自乾隆辛丑爲休甯戴東原氏手
 訂 先宗丞公時官京師郵筒往復考證之力居多
 迄今垂八十載同人有開局續修之議以 先宗丞
 公嘗從事於茲也諉穀以草創之役爰覆勘前志補遺
 正誤復繫以八十載事蹟爲續編義例一本前志卷數

亦如之而孝義不錄捐輸藝文力芟冗濫較前志倍加
嚴慎稿成郡博沁水霍桐柯師爲之審定廼就正於
牛毓山 田淑芳兩郡伯 曹濯江 周怡
園兩邑侯而授諸梓穀學識謏陋非敢妄詡古史氏家
學勉以應同人之請昕夕竭蹶兢兢焉惟恐隕越
先宗丞公之舊業是懼謹述載筆之顛末附於卷尾以
誌來者咸豐辛亥九月邑人書農曹樹穀跋

稷
山葛魯川梓

八冊共

25.00元



原件收藏

山西省图书馆

原件书号

7575-82

原件状况

原件有部分有污迹

原件个别地方字迹模糊

[咸豐]汾陽縣志十四卷 首一卷

(清)周貽纓撰 曹文錦修纂

清咸豐元年刻本

八冊

本部书共摄制 2 卷

(1) 首一卷 卷一至卷十

(2) 卷十一至卷十四

版权所有 不准复印

本部书完

本片卷含： 卷十一至卷十四